



Viro Illustrissimo,
Canonico Andreae de. Forio,
ut se commendat

Scipior.

(4)

ARTIFICVM

LIBERAE GRAECIAE TEMPORA.

DISSERTATIO

QUAM

**AD SUMMOS IN PHILOSOPHIA HONORES AB AMPLISSIMO
PHILOSOPHORUM ORDINE IN UNIVERSITATE FRIDERICIA
GUILIELMIA RHENANA LEGITIME IMPETRANDOS**

UNA CUM ADIECTIS SENTENTIIS CONTROVERSIIS

DIE XX. M. MARTII HORA X

PUBLICAE DEFENDET

HENRICUS BRUNN

**SEMINARII NOBIS PHILOLOGICI IN EADEM UNIVERSITATE NUPEN SODALIS
SENIOR.**

ADVERSARIORUM PARTES SUSCIPIENT

**HENRICUS KEIL
CAROLUS PRIEN
IOSEPHUS REISACKER**

SEMINARII PHILOLOGICI SODALES ORDINARIIS.



BONNAE,
LITTERIS CAROLI GEORGII.
MDCCCXXXIII.



VIRIS ILLUSTRISSIMIS

FRID. TH. WELCKERO


FRIDERICO RITSCHelio

PRAECEPTORIBUS DILECTISSIMIS

TESTIFICANDAE PIETATIS CAUSA

D.

DISCIPULUS.



PRAEFATIO.

Specimen ubi erat edendum studiorum meorum, placuit eligere materiam, in qua pertractanda non minor esset philologiae pars quam archaeologiae quae dicitur. Quamquam enim in antiquae artis historia elaborare propositum sit mihi, non tamen potui non assentiri Fr. Ritschelio, praecptori dilectissimo, qui sine philologiae lumine caecutire archaeologiam suo iure contendit. Cui consilio aptissimae videbantur de artificum temporibus quae sunt quaestiones difficillimae quidem, sed in quibus etiam post fructuosissima virorum doctorum studia de fructu haud contemnendo non desperandum esse periculo facto cognovi. Videbantur enim multa certius constitui posse, partim singulis testimoniis diligentius quam adhuc factum est examinatis, partim collatis inter se omnium vitis, in quo permultum videbatur relictum esse criticae arti. Sed cum omnium artificum tempora uno quasi impetu

absolvere et vires superaret meas et temporum angustias, in Alexandri aetate subsistere statui omissis praeterea pictoribus, quorum cum continua series Alexandri aetatem superaret, in aliud differre tempus et in aliam relegare commentationem eorum tempora placuit. In iis autem quae pertractavi, ita sum versatus, ut omitterem quae ab aliis iam sunt antea recte constituta, ita ut, si taceo, e silentio possis concludere me cum Silligio consentire, cuius catalogum mihi quoque fundamento esse volui. Praeterea Thierschii epochas (edit. alt.) et Muel-leri de Phidia commentationem semper ad manus mihi fuisse profitendum est. Ad quos cum omnis fere disputatio mea recurrat, ut sine illis omnino intelligi non possit, ipse saepe ut brevior esse possem, omisi disertius exponere quae ex iis cognosci possent. Quod ne indiligentior videar monitum volo.

Bonnae, ipsis Calend. Mart. MDCCCXXXIII.

Tempora describere cui propositum est cum non possit ad fabularum aetatem descendere, apparet ab harum commentationum fine alicum esse de iis exponere artificibus, quibus ab arte artisque generibus nomina sunt imposita, quorum nominibus non singulos artifices, sed artificum artiumque genera quaedam significasse antiquissimam famam, dudum viderunt viri docti. In quorum numero esse Daedalum, Eucherem, alios cum constet inter omnes, iis adiecit Welckerus 1) Thericlem (Mus. Rhen. VI, 1838 p. 404 sqq.), fictum esse nomen a thericleis poculis, ornatis animalium figuris ita demonstrans, ut de hoc iam dubitandum non sit. Deinde in Schornii diar. art. 1830, n. 49 et 50. 2) Endoei artificis nomini similem subesse significationem e Pausaniae verbis concludit, quae sunt VII, 5, 4: τοῦτο Ἐνδοίου τέχνην καὶ ἄλλοις ἐτεκμαιρόμεθα εἶναι καὶ ἐς τὴν ἐργασίαν ὁρῶντες ἔνδον τοῦ ἀγάλματος, καὶ οὐχ ἥκιστα ἐπὶ ταῖς Χάρισσι καὶ Ὠραῖς, αἱ πρὶν ἐστειλεῖν (in statnam) ἐστέχασιν ἐν ὑπαίθρῃ λίθου λευκοῦ. Testem enim esse Pausaniam a propria quadam interioris statuarum partis structura, τῆς ἔνδον ἐργασίας Ἐνδοίου, nomen esse factum. Quod autem idem Pausanias I, 26, 5 a Callia dictam esse tradat Minervae statuum ab Endoeo factam, id ita esse explicandum, ut posteriore tempore una cum artificis ficti nomine dedecantis quoque alicuius ficti nomen sit additum *). In quibus quamquam

*) Talium inscriptionum rationem ut explicaret, exemplum attulit equi Durii qui dicebatur Athenis hanc: Χαλκίδεμος Ἐδωγγέλου ἐκ

recte statuisset de Endoei nomine Welckerus videtur, de Callia tamen non audeo certius iudicare. Tantum quidem absum, ut Thierschii (p. 47 et 124) sententiam probem de Callia Phacnippi filio cogitantis, ut iam antequam Welckeri legissem dissertationem, dubitarem, cum et de priore et de posteriore quodam Callia cogitare liceat. Sed movet me inscriptio Attica, non quidem integra, sed in qua praeter Endoei artificis nomen agnoscantur verba: *ΑΝΕΘΕΚΕΘΑΝΟΣΑΝ*, ut de inscriptione posterius addita cogitare non audeam. Sed malo in incerto rem relinquere, cui testimoniis potius quam coniecturis opus est.

Placet igitur ab his fabularum tenebris transire ad quaestionem cum fructuosiorem, tum difficillimam, quae est:

De antiquissimis artificibus Samiis.

1. In omni autem huius quaestionis difficultate cognoscenda ut oculi succurrant² menti, habcas stemmata horum artificum, alterum quale proposuit Thierschius p. 183 (quod probarunt Silligius et Rossius *Archaeologiae* quae prodiiit Athenis 1841, §. 78), alterum quale O. Muellerns significans potius quam demonstrans quid sentiat, (*Archaeol.* §. 69; alio enim loco accuratius cum id exposuisse non potui invenire) quod ipsum argumentis accuratius expositis probare conabor:

Κολήης ἀνεθῆκε (Schol. Arist. av. 1128); tria haec nomina certa significatione posita esse censens. Mirum certe, quartam quoque quod postea in ipsa inscriptione Athenis inventum est nomen Strongylionis artificis (Schoell. in diar. art. 1840, 75) talem explicationem admittere, ut sit eius, qui opera facit rotunda. Quae inscriptio cum litteris sit perscripta antiquis, ut in se confirmetur, quod scholiasta putat, ad equum quod erai in acropoli respicere Aristophanem in avibus, quae acta est OL 91, 2, vix videtur cogitari posse de Strongylione Praxitelis aequali.

I. Thierschu	II. Muellcri
Rhoecus	Rhoecus
Theodorus Telecles	Theodorus Telecles
⋮	
Telecles	
Theodorus	Theodorus

In quibus turbis certum est: duos fuisse Theodoros, alterum Rhoeci, alterum Teleclis filium, testibus de Rhoeci filio Diodoro I, 98; Diogene Lacrt. II. s. 104, quocum ad verbum paene consentit, qui patris quidem nomen omittit Hesy chius Miles. de viris illust. v. *Θεόδωρος*; de Teleclis filio Herodoto III, 41; Tzetza Chiliad. VIII, 121, 212. Pausanias errore Teleclis filium nominat qui est Rhoeci filius, Teleclis frater secundum Diodorum. Porro constat, Theodorum Teleclis filium artem exercuisse inter Ol. 55 et 58, quippe qui Croeso ab Ol. 55, 1 regnanti crateram faceret Delphos dedicatam ante templi incendium, Ol. 58, 1. (Herod. I, 51. Paus. X, 5, 5.) Sed iam de altero Theodoro littem movet Plinius his verbis (XXXV, 12, 152): *Sunt qui in Samo primos omnium plasticen invenisse Rhoecum et Theodorum tradant, multo ante Bacchiadas Corintho pulsos, unde Thierschius et qui eum secuti sunt, ad Olympiadum initium referre volunt hos artifices, ob eamque causam Teleclem Theodori fratrem diversum esse a Theodori II patre statuunt. Diligenter igitur examinemus ratiocinationes Plinii. Plasticen invenisse dicit hos artifices aperto errore, quem notavit Welckerus ad Philostr. p. 196. Sed genuit error errorem; cum enim ita pergat, ut Euchira et Eugrammum, qui comitati sint Demaratum Bacchiadam profugum, in Italiam transtulisse plasticen dicat, apparet ex hac artificum fuga Plinium conclusisse, ante hos *plastas* vixisse, qui invenissent plasticen: Rhoecum et Theodorum.*

2. Plinii igitur ratiocinatio cum nos movere non possit, quaerenda, sunt alia argumenta, quibus utamur in tempore constituendo si non certissima, tamen probabilia. Quare digrediamur ad aliam rem et quae ne per se quidem aliena sit ab his commentationibus, ad Ephesii Dianae templi historiam. Narrat enim Diog. Laërt. l. l. et iisdem fere verbis Hesych. Miles. l. l. (rem non addito nomine Plinius XXXVI, 14, 95) Theodori consilio ob solum palustre fundamenta illius templi carbonibus calcatis esse substrata. Atque de quo templo id intelligendum sit, dubitare vix licet. Nemo enim cogitabit de *ἱερῶ*, quod a Coreso indigena et Epheso conditum est, *ἱδρὺν*, antiquissimis fabularum temporibus (Paus. VII, 2, 4), nec de eo quod post Herostratum sub Alexandri tempus non aedificabatur, sed restituebatur (Strab. XIII, 640. Plin. XVI, 79.) Restat igitur unum illud a Chersiphronē inchoatum, (Plin. VII, 37, 38. Vitruv. VII. praef. §. 16. coll. 12. Strab. l. l.) quod Plinius a tota Asia aedificatum esse refert. Quod cum per se non verisimile videatur (quinam enim erat inter Asiae populos nexus?), verum nos docet Dionysius Hal. III, 25, qui ab Ionibus Asiae templum aedificatum dicit toti genti commune sacrum. Quae de ea re apud Livium I, 45 sunt, non curanda videntur, cum omnis orationis nexus doceat e Dionysio ipso aut ex eodem fonte eum hausisse, unde Plinius quoque sua videtur sumpsisse. Quod vero Herodoti testimonio (I, 92) certum est, columnas eius templi plurimas exstructas esse a Croeso, id ita est explicandum, ut templum inchoatum tantum ab Ionibus statuamus ante bella cum Croeso gesta, e quibus cum ille victor evaderet, bellis intermissum opus denuo suscepisse victorem divitiis pollentem. Sed tamen hinc de operis initio nil concludi posset, nisi sciremus primum institutum esse templum a Chersiphronē Gnossio, epistylia columnis imposita esse (non ante Croesum) a filio eius Metagene (Vitr. X, 2, 12 Schneid.), unde consequitur esse opus vix tot ante Croesum annis inchoatum, quot a patre distet filius, i. e. sub Ol. 50.

3. Commode hoc loco ea commemorantur, quae dicenda sunt de Demetrio deque Paeonio Ephesio, qui perfecerunt Ephesium templum [Vitruv. VII. praef. §. 16.: falso Rossius arch. §. 130, 1 ex hoc Paeonio duos efficit: alius et qui tertius inserendus est catalogo artificum, a Vitruvio X, 2, 13, 14 memoratus architectus *nostra memoria.*], et de Daphnide Milesio, qui cum Paeonio Milesium Apollinis templum instituit (ibid.). E Plinii enim verbis (XXXVI, 14, 95) qualia sunt in omnibus fere codicibus, templum *Ephesiae Dianae ducentis viginti annis factum a tota Asia*. Quibus circiter ad Ol. 105 deferamur, quo tempore deflagratum templum nondum erat restitutum. Quare examinemus alteram scripturam *centum viginti annis*, quam invenit in codicibus suis Salmasius, in Bambergensi et Monacensi L. de Ian., ut disertis verbis dicit in appendice editionis Silligianae (p. 451; CXX annis); quod enim in diario art. 1833, 50, ubi de alia quadam scriptura agebat, *ducentis* in codicibus esse scribit, negligentia videtur factum esse. Iam apud Strabonem XIII, 634 haec sunt: τὸ μαντεῖον τοῦ Διδυμείως Ἀπόλλωνος . . . ἐνεπλήσθη ὑπὸ Ξέρξου, καθάπερ καὶ τὰ ἄλλα ἱερὰ πλὴν τοῦ ἐν Ἐφέσῳ . . . Ὑστερον δ' οἱ Μιλήσιοι μέγιστον νέον τῶν πάντων κατεσκεύασαν, unde corrigendus est O. Muellerus arch. §. 109, 15, post Ol. 71, i. e. post prius incendium hoc templum aedificatum esse censens. Maximam autem huius oraculi auctoritatem si reputamus, probabile videtur, restitutum esse statim post Persarum iugum a Graecis Asiae civitatibus excussum, quod factum est paulo post Scyrum a Cimone captam: Ol. 78, 3. Diod. XI, 60. Ad idem autem tempus ducimur CXX illis Plinii annis, ita ut Ephesium templum perfectum sit aut statim post liberatos Graecos, aut sub ipso Xerxis imperio, cuius magna videtur fuisse huius templi verecundia.

4. Olympiadi igitur 50 assignandus est Theodorus Rhoeci filius, fundamenta templi a Chersiphronē inchoati carbonibus substrui iubens, cum in alio templo id factum esse ut statuamus,

testimonia desint, de hoc affirmet Plinius licet non addito Theodori nomine. Quibus omnibus efficitur, ut reiecto Thierschii stemmate Muellero assentiamur unum tantum Telecleni et Theodori I fratrem et II patrem statuenti; unde, ut hoc statim addatur, Heraeum Samium sub Ol. 40 a Rhoeco esse aedificatum (Herod. III, 60) concludere licet; cui temporis non repugnat, quod circa Ol. 37 crateram dedicatam esse in Heraeum Herod. III, 152 refert, si tenemus a templo diversum esse τὸ ἱερόν, illud quidem antiquissimum. — Contra hoc serius quod constituimus horum artificum tempus e temporum computatione, nil valere posse quae praeterea de iis narrantur, breviter significare satis habeo. Quod enim cum Smilide coniunguntur Rhoecus et Theodorus a Plinio XXXVI, 13, 90, id de artis indole, de antiquissima artis Samiacae disciplina intelligo, cuius erat princeps Smilis eodem modo, quo Daedali nomen apud Atticos et Cretenses artifices saepissime recurrit. Deinde de inventis eorum quae referuntur (Plin. VII, 56), iam demonstravit Thierschius p. 202, talia fere omnia de perfectione, non de inventione esse intelligenda. Quare quod dicuntur invenisse aeris fundendi artem, id ita fortasse intelligendum est, ut primi funderent statuas cavas, antea solidas (massiv), quo invento plurimam cepit ars utilitatem. Denique Diodori narrationis de Apollinis Delii statua tam est obscura et suspecta natura, ut inde nunc quidem nil consequatur contra argumenta quae protuli historica.

Ab his Samiis artificibus, quorum nec discipuli nominantur, nec omnino qui Sami postea artem ab iis acceptam co-luerint, transeo ad Ageladam non quidem ductus temporum ratione, sed quod huius vitae tanquam fundamento tota fere artificum historia superstruenda est.

De Agelada.

1. De tempore Ageladae Argivi quae nobis tradita sunt, cum ad unius hominis vitam referri posse non videantur,

eam sunt ingressi explicandi viam Thierschius et Silligius, ut in unius nomen congesta statuerent; quae ad duos eiusdem nominis artifices pertinerent. Qua in re cum ita versaretur Silligius, ut utrumque Argivum censeret, habuit sibi adversantem Thierschium p. 160, qui alterum fuisse Argivum circa Ol. 70, alterum Sicyonium statuit ipso belli Peloponnesiaci initio superstitem. Quod ut probet 1) Amasaeum in versione horum Pausaniae verborum (V, 24, 1) τοῦτο δὲ ἐστὶν Ἀσκάρον τέχνη Θηβαίου διδασχθέντος παρὰ τῷ Σικυνώφ [Ἀγελάδῃ], Ageladae nomen e codicibus addidisse, 2) in tempore belli Phocensium et Thessalorum constituendo, e cuius praeda donarium fecit Thessalorum Ascarus, Pausaniam errasse contendit. Ex eo enim bello: ὃν πρότερον ἔτι ἐπολέμησαν πρὶν ἢ Μήδους καὶ βασιλεῦ ἐπὶ τὴν Ἑλλάδα διαβῆναι, victores evasisse Phocenses teste Herodoto VIII, 27; praeterea Pausaniam non quao certis testimoniis cognosset, nobis tradidisse, sed ipsius coniecturam. Quod quumquam verum est, tamen ea ipsa coniectura non habet cur improbetur. Ita enim manca cum sit illorum bellorum historia, ut certis argumentis et testimoniis omnia demonstrari posse ipse neget Thierschius, tependa videtur Pausaniae coniectura, si probabilem esse probabilioremque Thierschiana certis adducimur argumentis ut credamus. Loquuntur quidem de Thessalorum tantum cladibus et Herodotus l. l. et Pausanias X, 1, 2. Sed docet omnis narratio maiores fuisse Thessalorum vires quam Phocensium. Non enim aperto proelio aggredi audent Thessalos, sed dolis utuntur a Tellia vate inventis, summus est hostium timor et rerum desperatio, ut inde in proverbium abierit ἀπόνοια Φωκική. Κατελήθθησαν ἐς τὸν Παρνησσὸν οἱ Φωκῆες (Herod.), quod certe non factum esset, nisi victis antea Phocensibus. Non semper autem propitiam fuisse Phocensibus fortunam ipsa Pausaniae verba demonstrant, qui cladem trecentorum Phocensium nobis narrat, quae ad summam eos desperationem adegerit. Nihil igitur videtur repugnare victoriae Thessalorum illis temporibus de Phocensibus reportatae.

(Narrat Herodotus VIII, 32 et 33, Thessalos Persarum exercitum per Phocensium terram duxisse, quo in itinere tota terra vastabatur, complures urbes et templa, in quibus clarum illud quod erat Abis Apollinis *Θησανροδοί τε καὶ ἀναθήματα πολλοῖσι κατασκευασμένον*, spoliabantur, incendebantur: qua in re certe non minima Thessalorum erat pars, ut fortasse ex his spoliis Thessalorum pararetur donarium, quod ab artifice Thebaeo, quorum urbs illo tempore cum Thessalis Persarum partes agebat, faciendum curarent. Id quod Pausaniae testimonio non valde repugnat).

2. Quare accedendum est ad alterum Thierschii argumentum ex Amasaci auctoritate depromptum. Quod fortasse iam ipse reiecit novissimis Pausaniae editoribus obtemperans. Nam cum antea esset in editionibus: *παρὰ τῷ Σικωνίῳ . . . καὶ Θεσσαλῶν φασιν εἶναι, ὅτε Φωκεῦσιν εἰς πόλεμον οὗτοι κατέστησαν*, e codicibus *φασιν* pro *φασιν*, *εἰ δὲ* pro *ὅτε* reslitterunt, *τινὰ* pronomen post *πόλεμον* inseruerunt, unde post *εἶναι* distinguendum, post *Σικωνίῳ* autem maior lacuna statuenda videtur, quam ita explerunt probabili coniectura: *τὸ δὲ ἐπίγραμμα τὸ ἐπ' αὐτῷ δεκάτην ἀπὸ τοῦ πολέμου Φωκίων καὶ Θεσσαλῶν φασιν εἶναι*. Quam lacunam cum non suppleret e codicibus Amasacus, neque Ageladae nomen e codicibus eum inseruisse certum videtur. Ceterum nec Heynii coniectura (opusc. acad. V, 368), quam probavit Silligius: *Κανάχη* placet. Excidisse potius videtur artificis minus clari nomen, cuius tempus esset incertum, quia e clari artificis tempore belli tempus constituere potuerat Pausanias. — Sicyonius igitur Ageladas cum iam evanuerit, accedit quod cum Thierschius Sicyonium illum velit esse Herculis Melitensis sculptorem, Polycleti et Myronis, non Phidiae praeceptorem, in scholiis ad Arist. ran. 504 Ageladas Herculis sculptor et Argivus et Phidiae praeceptor nominatur. Quod autem in Iovis Ithomaci mentione a Pausania III, 33, 3 patria Ageladae non est addita, id in alteram potius, quam in Thierschii partem vim habet. Si enim diversae patriae notitiam habuisset

Pausanias, certe addidisset in tali genere diligentissimus scriptor.

3. Iam quid omnino de duobus eiusdem nominis artificibus censendum sit, e veterum testimoniis accuratissime inter se collatis diiudicandum est. Et Herculem quidem Melitensem fecisse Ageladam, testantur et Tzetza Chil. VIII, 191 et schol. ad Arist. ran. 504; de quo non est quod dubitemus. Sed quod addit scholiasta: *ἡ δὲ Ἰδρυνσις ἐγένετο κατὰ τὸν μέγαν λοιμὸν, ὃθεν καὶ ἐπαύσατο ἡ νόσος*, id iure nostro videmur impugnare posse. Primum enim male nos habeat oportet, quod de opere traditur a praeceptore post mortem discipuli Phidiae confecto, qui non iuvenis sed senex mortuus est: quod certe incuriae arguit scholiastam. Deinde vero totam illam de peste Attica narrationem reiiciendam esse recte iam viderunt et Welckerus diar. art. 1827, n. 81 et Muellerus de Phidia §. 7, qui multo antiquius esse illud cognomen et Delphis Athenas translatum haud dubitat. Quod paulo planius exponit in Doriens. I, p. 455, maxime respiciens ad oraculum Delphicum apud Demosth. in Mid. 15, in quo Iuppiter, Hercules, Apollo *προστατήριος* coniunguntur. Idque valde confirmatur eo, quod Pausanias I, 34, 2 in describendo Amphiarai oraculo antiquissimo eius aram commemorat in quinque partes distributam mystica certe significatione, in cuius prima parte erat Hercules, Iuppiter, Apollo *Παιών*. Ad mysteria autem omnino Herculem *Ἀλεξικάκον* spectare, inde quoque quam maxime mihi persuasum est; quod Melitae, Atticae pago, eius erat sacrum, *ἐν ᾗ ἐμνήθη Ἡρακλῆς τὰ μικρὰ μυστήρια* (Schol. l. l. et Lexicographi v. *Μελίτη*). Talia autem mysteriorum initia quaerenda sunt in antiquissimis religionibus, non in Peloponnesiaci belli morbis. Accedit ad hoc Thucydidis testimonium de peste II, 47: *ὅσα τε πρὸς ἱεροῖς ἰκέτευσαν ἢ μαντείαις καὶ τοῖς τοιούτοις ἐχρήσαντο, πάντα ἀνωφελῆ ἦν, τελευτῶντές τε αὐτῶν ἀπέσιθον ὑπὸ τοῦ κακοῦ νικώμενοι* (cf. *ἐαρ. 53 s. fin.*): unde hoc quidem certe falsum est, quod scholiasta dicit: *ὃθεν καὶ ἐπαύσατο ἡ νόσος*.

De Plinio denique prorsus assentior Muellero (§. 8, ann. r) sic iudicanti: *ex hoc signo ad pestem Atticam male relato nescio an etiam fluxerit error Plinii Ageladam epochae Olympiadis 87 assignantis* (XXXIII, 8, 49).

4. Digredi placet hoc loco ab Hercule Avcrrunco ad similia aliorum dcorum, maxime Apollinis cognomina, quae non minus falso ad pestem illam referuntur. Primum enim Pausaniae fidem, qui haec refert, suspectam reddunt ipsius verba de Apolline Avcrrunco I, 3, 3: τὸ δὲ ὄνομα τῷ θεῷ γενέσθαι λέγουσιν, ὅτι νόσον ὁμοῦ τῷ Πελοποννησίῳ πολέμῳ πιέζουσιν κατὰ μάντευμα ἔπαισεν ἐκ Δελφῶν, quae ad populum aut monumentorum interpretes pertinere hanc famam testantur, quorum quidem multo maiores errores novimus. Huic vero famae superstruxit Pausanias, quae de *Ἐπικουρίῳ* Phigaliensi, VIII, 41, 5, *Ἀκισίῳ* Elidensi, VI, 24, 5 coniecit. Deinde autem et hic repugnat duplex Thucydidis testimonium 1) de peste non levata, 2) II, 54 affirmantis non intrasse morbum intra Peloponnesi fines ὅ,τι ἄξιον καὶ εἰπεῖν. Herculi autem si Avcrrunco nomen proprium et ex natura est inditum, magis etiam convenit Apollini, cuius summa vis cum in puniendo, vindicando, tum in sanando, avcrrunco est posita, (v. Mueller. Dor. I, 296 sqq. et supra quae de Amphiarai ara diximus) ut haec quoque cognomina Peloponnesiaco bello multo putem antiquiora. Quae cum ita sint, non solum cadunt, quae de Phigaliensi templo tradit Pausanias, de quo quae praeterca monenda sunt, vide ap. Mueller. §. 8. et in Zimmermanni ephemer. 1832. II, n. 39, sed etiam Calamidis actas paulo aliter videtur constituenda. In quo male me habuit, quod cum ante Myronem et Phidiam ponendus sit secundum id quod de arte eius iudicium Quintilianus facit, post Phidiae senis mortem fecisso cum Apollinem Avcrrunco tradit Pausanias (I, 3, 3). Deinde nimium videtur protrahi eius actas; nam cum in Hieronis curru esset occupatus, qui paulo post eius mortem, Ol. 78, 2 dicatus erat, tunc non incepisse cum arte exercere, sed iam clarum fuisse

ex eo videtur prodire, quod cum Onatas clarissimus tunc artifex statuam faceret, Calamis fecit equos, in quibus conficiendis summa erat inter aequales eius gloria. Idque optime confirmaretur, si certum esset iam Ol. 75, 2 Agrigentinis eum fecisse donarium de Motya capta, ut cum probabilitate quadam proposuit Meyerus ad Winckelm. hist. art. VIII, 2, 42. Reiecto autem Apolline ad pestem Atticam relato, de quo dubitat etiam Muellerus annal. Vindob. 1827. Vol. XXXVIII, p. 276, aetas Calamidis Onatae aequalis optime consentit cum Quintiliani iudicio. Cui nec Mercurii *Κροφόρον* quae erat Tanagrae Calamidis statua (Paus. VIII, 22, 2) repugnat, quoniam si Peloponnesiaco bello de morbo cognomen esse impositum Mercurio Pausanias sumpsit, plane eum refellit Onatae Mercurius *Κροφόρος*: Paus. V, 27, 5. — Panem denique *Αυτήριον* (Paus. II, 32, 5) Persico potius, quam Peloponnesiaco bello assignare velim; cf. Herod. VI, 106. Plut. Arist. 11.

5. Sed revertamur ad Ageladam, cuius vitam quamquam in angustiores contraximus fines, ea ipsa videtur humanam excedere conditionem. Si enim sumimus, iam Ol. 65 artem exercuisse Ageladam, habemus usque ad id tempus, quo Iovem Ithomacum fecit, fere septuaginta annos. Quare ne cogamur temporum ratione, ut duos fuisse Ageladas statuamus, ea est ingredienda via, quam significarunt quidem, sed non satis probaverunt Meyerus ad Winckelm. hist. art. VIII, 1, 10, Siebelisius ad Paus. VI, 10, 2, Muellerus de Pbid. §. 6. Negandum enim est victorum Olympicorum statuas omnes statim post victorias esse factas, unde iam non cogimur statuere ea ipsa Olympiade, qua quis vicit, artificem iam floruisse, qui statuam eius fecerit. Quod ut demonstramus, primum examinemus, quae ab aliis ad hanc sententiam firmandam allata sunt exempla, quibus deinde nova et exempla et argumenta addamus. Et Meyerus quidem ad unum Oebotam provocat Dymaeum, de quo haec narrat Pausanias VII, 17, 6: *νικήσαντι Ὀλύμπια Ἀχαιῶν πρώτῳ* (Ol. 6. cf. §. 3; VI, 3, 4; Afric. ap. Euseb.) *γέγρα; οὐδὲν ἐξαίρετον παρ'*

αὐτῶν ἐγένετο εὐρασθαι· καὶ ἐπὶ τούτῳ κατάρας ὁ Οἰβώτας ἐποίησατο μηδενὶ Ὀλυμπικὴν νίκην ἔτι Ἀχαιῶν γενέσθαι· καὶ (ἦν γὰρ τις θεῶν ᾧ τοῦ Οἰβώτα τελεῖσθαι τὰς κατάρας οὐκ ἀμελὲς ἦν) διδάσκονται ποτε οἱ Ἀχαιοὶ, καθ' ἣντινα αἰτίαν στεφάνον τοῦ Ὀλυμπίαν ἡμάρτανον, διδάσκονται δὲ ἀποστείλαντες ἐς Δελφούς· οὕτω δὲ καὶ ἄλλα ἐς τιμὴν σφίσι τοῦ Οἰβώτα ποιήσασι καὶ τὴν εἰκόνα ἀναθεῖσιν ἐς Ὀλυμπίαν (Ol. 80: Paus. II. II.), Σώστρατος Πελληγεὺς σταδίου νίκην ἔσχεν ἐν παισίν. Quod si verum est, Oebotam Ol. 6 victorem Ol. demum 80 statua nobilitatum esse, hic ratio eius est nulla habenda, cum Ol. 59 primam victori statuam positam esse Olympiae doceat Pausanias VI, 18, 5. Sed cum post Oebotam, primum omnium Achaeorum victorem, secundum dicat vicisse Sostratum post Ol. 80, ipse sibi repugnat. Nam III, 15, 1 tradit Ol. 23 stadio vicisse Icarum Hypere-siensem Achaeum; V, 9, 1 Plataeum Dymacum καὶ Ol. 71, et ex Africano scimus Ol. 67 vicisse stadio, recursu, cursu armato Phannam Pellencensem. Inde cum omnis Pausaniae narrationi fides detrahatur, accedit quod Plataeensi pugnae interfuisse Oebotam fama erat (Paus. VI, 3, 4). Reiectis igitur Pausaniae narrationibus, statuendum est aut ob aliam causam posterius esse positam Oebotae statuam, aut vicisse alium Oebotam Plataeensis pugnae tempore, neglectum a civibus, a quo usque ad Ol. 80 Achaei victoriae participes non fierent; idque pro certo affirmare non dubitarem, nisi fuisset in inscriptione statuae (Paus. VII, 17, 3): Οἰβώτας σταδίου νικῶν, quod de victoria virorum circa Ol. 75 reportata accipi vetat Africani index, de puerorum victoria intelligere non audeo ob παῖδας vocabulum omissum. Incerta igitur huius est exempli auctoritas. Eorum deinde, quae attulit Siebelisius (VI, 10, 2), unum tantum vim habet in meam partem. Chionis enim, cuius statua posterius confecta erat *), Ol. 29 vicit,

*) A Myrone, in quo cur offenda Pausanias non video; nam ut columna posterius est dicata victoriarum memoriae, sic statua quo-

quo tempore statuae victoribus non ponebantur. Quamobrem Eutelidae quoque statua, qui vicit Ol. 38, non est curanda. Neque curandus est Hieronis currus, cum paulo post victoriam mortuus sit Hiero. Quod idem si de Glaucō contendit Carystio Silligius, incuriae est accusandus. A patre enim Glaucos Olympiam erat perductus (Paus. VI, 10, 1) pugil pugnaturus, iuvenis ut videtur et οὐκ ἐμπείρως ἔχων τῆς μάχης. Alio igitur loco nondum pugnaverāt. Reportavit autem post Olympicam victoriam duas Pythias, octo Nemeaeas et Isthmias; quare cum filius statuam poneret Olympiae, non potest statim post victoriam posita esse, patre diu post eam superstite *). Cui exemplo nova sunt addenda haec: Chilonis Patrensis (Paus. VI, 4, 4), Polydamantis Scotussaei, cuius Ol. 93 ex Afric. victoris statuam fecit Lysippus, Diagorae, qui vicit Ol. 79 (Paus. VI, 7, 1), quem fecit Callicles Megarensis; cuius pater Theocosinus post Ol. 93, 4 superstes fuit (Paus. X, 9, 4). Quibus exemplis, quae ad manus erant, fortasse alia poterunt addi; ita, cum (Paus. VI, 16, 5) Polyphthis currus, Callitelis patris lucta victoris statua ἐπὶ στῆλης τῆς αὐτῆς posita essent, filius videtur posuisse patris statuam. Troili quoque statua (Paus. VI, 1, 2), qui vicit Ol. 102, si cui

que potuit dicari. Mirus autem est Silligii error sb. Chlonide artifice ad hunc Pausaniae verba referentis.

- *) Actum est de Glauci victoriis apud Suidam e Pausania sua haurientem et Bekkerum anecd. p. 232 et 227; ita ut in numero quidem victoriarum non consentiant, sed ut appareat, discrepantiam exortam esse e confusione victoriarum diversis ludis reportatarum. Quod apud eos est: vicisse πέμπτη καὶ εἴκοστῇ Ὀλυμπιάδι Glaucum, id mutandum est in π. κ. ἐξήκοστῇ, ob verba quae sequuntur apud Bekkerum: ἀπίθανε δὲ ἐξ ἐπιβουλῆς Γέλωνος τοῦ Συρακοσίων τυράννου. Ἐβδομηκοστῇ enim, quod Siebelisius l. l., Thierschius p. 195, Muellerus Aeg. p. 199 probant, ferri non potest, quia Ol. 75, 3 Gelo est mortuus, Glaucum autem diu post Olympicam victoriam superstitem fuisse ob reliquis victoriis constat.

nimis videtur producere Lysippi aetatem, non statim post victoriam eam esse factam sumere licet.

6. Est autem praeterea alia ratio, de qua nemo antea cogitavit, quae non semper statim post victorias positae esse statuas quam maxime suadet. Seimus enim permultos reportasse complures victorias Olympicas: attamen singulorum singulae tantum erant statuae. Has autem non post primam, sed post ultimam victoriam positae esse docent complures inscriptiones, in quibus priorum victoriarum mentio fit. Quid igitur? si non statim post primam vel secundam victoriam statuae positae sunt, cur statim post tertiam, quartam id factum esse contendamus? Mihi quidem, si conicere liceat, probabile videtur, tum demum victores statuarum curam habuisse, cum eo pervenissent, ut victoriarum honorem capessere aut per aetatem iam non liceret, aut ipsi victores aliam ob causam nollent. Similiter carmina victoriae celebrandae causa composita non semper statim post victorias scimus, sed interdum multo posteriore tempore. Accedit quod cum Ol. 59 prima statua poneretur*), vix probabile videtur statuere iam Ol. 65 aut 66 legem fuisse, ex qua victoribus statuae ponerentur, praesertim cum non semper victorum patriam, sed saepe amicos, cognatos, alios statuam curasse constet, quod de lege cogitari velat. — Quod si tenemus, detrahere aliquid possumus de Ageladae vita. Timasitheum autem Delphum, qui iam Ol. 68, 2 supplicio est affectus ab Atheniensibus, si quis mihi opponat, scito hunc ipsum meam causam defendere. Erat enim ex iis qui saepius vicerant et erat cum interfice-

*) Arrhachio enim non Olympiae, sed a civibus in patria positus erat. Eutelidae autem statua quando posita sit, incertum est, cum inscriptio iam Pausaniae temporibus evanuisse; verisimile est eodem tempore, quo Chioidis victoriarum memoria a Lacedaemoniis renovabatur, Eutelidae quoque rationem eos habuisse. Quod disputatum est contra Rossium, qui archaeol. §. 108, 1 Pausaniae auctoritatem impugnat.

retur, ea aetate, qua poterat victoriam capessere, quantum licet e Pausaniae huius viri mentione concludere, ut statuae curam tunc non haberet. Iam cum supplicio esset affectus ab Atheniensibus, patriae cives fortasse ipso commoti sunt, ut statua nobilitarent civem qui victoriis patriam nobilitasset.

7. Quae cum ita sint, nihil obstat, quominus ad unum Ageladam referantur omnia veterum scriptorum testimonia, qui cum sub OL 70 artem exercere coepisset, fere usque ad OL 82 superstes fuit, ut Iovis Ithomaci signum postremum fere eius opus videatur. Cui aetati optime conveniunt Pausaniae verba VIII, 42, 4: *ἡ δὲ ἡλικία τοῦ Ὀνατᾶ κατὰ τὸν Ἀθηναίων Ἡγίαν καὶ Ἀγελάδαν συμβαίνει τὸν Ἀργεῖον **. Onatam enim, qui, si Thierschii de Agelada sententiam sequeremur, medio inter utrumque Ageladam loco positus esset neutri aequalis, circa OL 78 floruisse, primum docet Hieronis currus, deinde Minervae Areae Plataeense templum ab Onata et Polygnoto picturis ornatum. De quo cf. infra Phidias. Ad idem fere tempus deducimur Thasiorum

*) De verbis, γενεαῖς μάλιστα [δυσὶν] ὕστερον τῆς ἐπὶ τὴν Ἑλλάδα ἐπιστρατείας τοῦ Μήδου, probo Thierschii sententiam p. 200, ann. 126. — Scripsit de Onata commentationem copiosissimam Rathgeberus in Erschii et Gruberi Encyclopaediae sect. III, part. 3, p. 410 seqq., quam ne dicam ipsam displicere, non tamen placet commentandi via et ratio. Cum enim paucissima tantum certo sciamus de hoc artifice, ne satis quidem accurate ea constituta sunt in hac commentatione: ita de templo Plataeensi aliter sentiendum est. Mirae autem negligentiae exemplum est, quod ubi de „immensa Marathoniae pugnae praeda“ loquitur, in annotatione laudat Herodotum VIII, 80, de immensa Plataeensis pugnae praeda ibi loquentem. Exigua autem illa fundamenta obruit quodammodo narrationum multitudo, continuam artificis eiusque operum historiam contexens, quam si veram esse posse largiri volumus, veram esse nullo fere argumento demonstrare possumus.

Hercule Olympiae dedicato. Nam cum ab Ol. 72 (Herod. VI, 44 et 46) usque ad Ol. 75 (Herod. VII, 118, cf. Thuc. I, 89) in Persarum essent potestate Thasii, ad quod Rathgeberus quoque animum advertit; Ol. autem 79, 2 ab Atheniensibus subigerentur opesque frangerentur (Thuc. I, 101), intra Ol. 75—79 Hercules ab Onata videtur factus esse. Unde iam apparet non Onatae patrem sed aequalem fuisse Miconem Atheniensem pictorem et statuarium. Quod cum recte contra Boettigerum (archaeol. pict. p. 254) monuisset Thierschius p. 197, non tamen recte se habet, quod videtur putare Thierschius pugnare in poecile porticu pictam esse statim post victoriam, cum Cimonis demum tempore id factum esse constet. Nec de Plataeensi templo ei est assentiendum.

8. Difficilior est quaestio de Tarentinorum duobus donariis e Peucetiorum et Messapiorum praeda factis ab Onata et Agelada, Paus. X, 13, 5; 10, 3; quae huic tempori tribuenda videntur. Herodotus enim VII, 170 mentionem iniicit summae cladis, qua a Messapijs affecti sunt Tarentini et socii Rhegini. Qua in re cum consentiat Diodorus XI, 52, addit in fuga divisum esse exercitum, alteram partem fugisse Tarentum, alteram i. e. socios Rheginos Rhegium, hostes item se divisisse tantoque successu persecutos esse Rheginos, ὥστε συνεισπεσεῖν τοῖς φεύγουσιν εἰς τὸ Ῥήγιον καὶ τῆς πόλεως κυριεῦσαι; idque factum esse Ol. 76, 4. Tamen paulo post (cap. 66) Rhegii eundem fuisse Miccythum Anaxilae tyranni Rhegini liberorum tutorem narrat Ol. 82, 2, qui et ante eladem et urbis expugnationem fuit. Cui narrationi si addimus quae refert Aristoteles Polit. V, 3: ἐν Τάραντι ἡττηθέντων καὶ ἀπολομένων πολλῶν γνωρίμων ὑπὸ τῶν Ἰωνύγων (Herod. Ἰήνυγας Μεσσαπίους) μικρὸν ὕστερον τῶν Μηδικῶν, δημοκρατία ἐγένετο ἐκ πολιτείας, et Strabo VI, p. 280: Ἰσχυσαν δὲ ποτε οἱ Ταραντῖνοι καθ' ὑπερβολὴν πολιτευόμενοι δημοκρατικῶς, videtur conieci posse, intentis viribus populi hoc imperium res reparasse, victis hostibus Rhegium liberasse, ut huic tempori (paulo post Ol. 76, 4) tribuendum sit

et Ageladae de Messapiorum et Onatae de Peucetiorum praeda opus. (Quae cum iam essent conscripta, Rathgeberum in eandem vidi incidisse sententiam.) Utrumque enim populum bello interfuisse docet Pausanias X, 13, 5: βασιλεὺς Ἰανύγων Ὠπιδῆων τοῖς Πευκετιοῖς σύμμαχος, quo interfecto et victis Peucetiiis lapyges quoque victi videntur. (Paulo aliter Lorentz: Tarentinorum res gestae. Elberfeldae 1838. p. 4 et 6.) Tamen has esse coniecturas paucis superstructas testimoniis monitum volo. — Ex Ageladae denique operibus in idem fortasse tempus incidit Hercules ille Melitensis. Ageladam enim in Attica vixisse Muellerus de Phid. §. 7 cum inde, [quod Phidiae et Myronis praeceptor fuit, tum ex hoc signo Melitensi recte videtur concludere. In eo vero, id quod post Ol. demum 79, 3 Athenas venisse putat Ageladam, quod ob ipsius de Phidiae vita sententiam libentius arripit, fortasse aliquo modo corrigi potest. Diodorus enim XI, 43 haec habet: Ol. 75, 4 Themistocles ἐπεισέ τον δήμον . . . καὶ τοὺς μετοίκους καὶ τοὺς τεχνίτας ἀτελεῖς ποιεῖσαι, ὅπως ὄχλος πολὺς πανταχόθεν εἰς τὴν πόλιν κατέλθῃ καὶ πλείους τέχνας κατασκευάσωσιν εὐχερῶς. Hoc igitur tempore si Athenas venit Ageladas, quod optime convenit Phidiae tempori, quamquam de hoc fortasse aliter statuendum (cl. de Phidiae Minerva Pellénensi), tunc eum fecisse Herculis signum Melitensibus concludere possumus, qui non quidem peste, sed periculo bellis Persicis imminente liberati Ἀλεξικάκῳ Herculi, gentis patrono, gratias erant acturi.

Cum Agelada in epigrammate Antipatri Anthol. Pal. II, p. 692 coniunguntur Canachus eiusque frater Aristocles Sicyonii. In quō quamquam dubitare licet de eo, quod Musarum statuis ab eis confectis musicae artis tria genera significata dicit Antipater maxime ob chroma, quod post illorum artificum aetatem communi usu invaluit, tamen quod ad tempus attinet, recte videntur coniuncti, ut nostro iure ab Agelada possimus transire ad hos Sicyonios artifices.

De Canacho Sicyonio.

Huius aetatem ex eo tantum definire licet, quod Milesiis fecit Apollinem Philesium. Quem si post Mycalense proelium Xerxes Ecbatanam abduxit, ante Ol. 75, 2 factum esse consequitur. Sed huius de Xerxe et de Branchidarum fuga narrationis fidem merito impugnat Soldanus Zimmerm. ephemer. 1841, n. 69; tamen non est valde mutanda Apollinis illius historia. Bene enim monet ipse Soldanus p. 573: videri Carios illos Darii accolae, non Branchidas post liberatos Graecos (Ol. 77, 3. Diod. XI, 60) vastato spoliatoque templo ad Xerxem fugisse, unde odium Milesiorum ipsis Alexandri temporibus. — Post Ol. 70, 3 sive potius 71, 3 (cf. Clinton fast. Hell. h. a. et append. c. V) factum esse Apollinem, ex eo concludit Muellerus diar. art. 1821, 16, quod illo ipso anno templum et oraculum Milesium a Dario et expilatum et incensum esse tradat Herodotus his verbis VI, 19: *ἱρὸν δὲ τὸ ἐν Διδύμοισι, ὃ νηὶς τε καὶ τὸ χρησιμώτερον σὺληθέντα ἐν ἐπιμνηράτο*. Quae cum non probet Thierschius p. 144, de rationibus eius iudicandum est. Et quod dicit, non verisimile esse Branchidas antiquissimis religionibus deditos neglecto vetere dei simulacro, quod in templo antiquissimo fuisse necesse sit, novi artificis imaginem substituisse, nihili est; nam si in incendio templi perierat vetus signum, non neglecta sed servata religione novum erat parandum. Cervus autem ille artificiose factus (Plin. XXXIII, 8, 75) ad templi et mysteriorum fortasse cultum pertinet, itaque potius ad templi signum, quam ad donarium aliquod, in quo nulla erat talis artificii ratio. Concedamus deinde Thierschio, potuisse non in templo, sed sub dio in *ἱερῷ* positum esse aeneum Apollinem, ut incendio non corripereetur, tamen remanet Herodoti *σὺληθέντα* vocabulum, quod non amovetur Strabonis testimonio XIII, 634 dicentis Xerxi demum tradidisse Branchidas opes dei, *θησαυρούς* [aut potius a Caribus demum raptas esse opes]. Poterant enim post prius incendium collectae esse novae opes, pote-

rant abscondita esse a Branchidis, quae erant auri, argenti opera; sed de colossico opere id sumere non licet. Neque quidquam consequitur e Taciti verbis (annal. III, 36) de Darii tutela huius oraculi, nisi quod Aeolicis incolis deleverat, restituisse semibarbaris illis Darium, quibus incolendam dedit Miletum Aeolibus in servitutem abductis (Strab. XIII, 611: ὥστε ἡμιβαρβάρους γενέσθαι φησὶ Δαμῆτριος ὁ Σκήψιος ἀπὲρ Αἰολέων. Herod. I. I.). Nam quod Thierschius in ipsa vastatione et incendio Darii tutela usum esse oraculum dicit, equidem non intelligo. Ex eo vero quod templum *κεκόσμηται ἀναθήμασι τῶν ἀρχαίων τεχνῶν πολυτελέστατα*, quid concludamus? Largiamur nihil esse deletum priore incendio; tamen abstulit Xerxis aetas illa *ἀρχαίων τεχνῶν* opera, ut aut aliunde esse allata illa antiqua opera post Xerxem, aut cum Apolline a Seleuco ab aliove rege reddita esse Milesiis statuendum sit. — Denique artis indoles non obstat quominus circa Ol. 73 floruisse Canachum statuamus. Cicero enim (Brut. 18) si Myronem Phidiae aequalem Calamidi in arte praefert, qui Ol. maxime 78 clarus, quare Ol. circiter 5 antiquior fuit, eodem iure Calamidem praeferre potest Canacho Ol. 73 claro. Apollo autem, qui ad exemplar Philesii videtur factus, cum Minerva Aeginetica comparatus confirmat potius, quam evertit Muelleri sententiam, siquidem e tabulis aer incisus iudicium ferre licet.

Ceterum res est valde ardua et periculosa de hac antiquissima arte iudicare, cum desint monumenta certo tribuenda artificei, e quibus iudicari possit. E scriptorum autem testimoniis quod componitur iudicium quam sit vagum, haec doceant, quae iam scripturus sum:

De Callone Aegineta.

Qui artifex ab omnibus nunc tribuitur Ol. 60. — 66 ob Quinctiliani XII, 10 de arte eius iudicium et quia Tectaei et Angelionis discipulus dicitur. Tamen si Quinctiliani de Cal-

lone et Ciceronis de Canacho iudicium comparamus, in artis genere plane sibi respondent :

rigidiora Canachi	duriora Callonis
molliora Calamidis	minus rigida Calamidis
pulchra Myronis	molliora adhuc Myronis.

Quodque intelligimus hac comparatione, id disertis verbis tradit Pausanias VII, 18, 6: *Μέναιχος καὶ Σοῦδας . . . Κανάχου τοῦ Σικωνίου καὶ τοῦ Αἰγινήτου Κάλλωρος οὐ πολλῶ· τινὲς ἡλικίαν ὕστεροι.* Iam antea Canachum post Ol. 70 artcin exercuisse vidimus. Quae si cui infirmiora videantur, alia comparatione hanc habeat confirmatam. Quinctilianus enim cum Callone coniungit Hegesiam; Lucianus rhet. praec. 9 cum Hegesia Critium et Nesiota, quos Ol. 75 Harmodii et Aristogitonis statuas (alteras) fecisse certum est (Marin. Par.): *τὰ τῆς παλαιᾶς ἐργασίας ἐστὶν Ἡγησίον καὶ τῶν ἀμφὶ Κρίτιον καὶ Νησιώτην* (ib., cf. Rossium diar. art. 1840, 11, cui prorsus assentior) *ἀπεσφριγμένα καὶ νευρώδη καὶ σκληρὰ καὶ ἀκριβῶς ἀποτεταμένα ταῖς γραμμαῖς.* Videtur igitur Callo ad tempus Ol. 70. potius quam 60. posterius pertinere. Qua probabilitate nisus coniecturam proferre audeo, quae si audacissima putabitur, non mirabor; sed iis quae attuli non repugnat. Narrat enim Pausanias III, 18, 5 de tripodibus Amyclaeis, tria genera discernens: *Αἰνήτος . . . τοῦτον γε οὖν ἐστὶν εἰκὼν καὶ τρίποδες χαλκοῖ, τοὺς δὲ ἀρχαιοτέρους δεκάτην τοῦ πρὸς Μεσσηνίους πολέμου φασὶν εἶναι· ὑπὸ μὲν δὴ τῷ πρώτῳ τριπόδι Ἀφροδίτης ἄγαλμα ἐστήκει, Ἀρτεμις δὲ ὑπὸ τῷ δευτέρῳ. Γιτιάδα καὶ αὐτοὶ τέχνη καὶ τὰ ἐπιεργασμένα, ὁ τρίτος δὲ ἐστὶν Αἰγινήτου Κάλλωρος, ὑπὸ τοῦτῃ δὲ ἄγαλμα Κόρης τῆς Δήμητρος ἐστήκεν.* tertium sequitur genus de pugna Aegopotamensi dicatum. Quae verba ita intelligere voluerunt Muellerus Aeg. 101, Thierschius p. 147, Silligius, novissimi Pausaniae editores, ut τοὺς δὲ — φασὶν εἶναι interposita (parenthetice) contenderent, libro autem IV, 14, 2, ubi de Gitiadae et Callonis tripodibus post bellum primum Messeniaceum dedicatis narratio repetitur omissis tantum artificum nominibus,

hanc ab interprete sciolo quodam insertam esse statuerent. Quae utraque horum virorum coniectura mihi non placet. Interpres enim si ad verbum descripsit Pausaniam, cur omittat artificum nomina? Plura autem tripodum genera cum distinguat Pausanias, cur unum in parenthesi commemorans omnem ordinem perturbet? perturbatum enim esse negari nequit. Contra optime omnia procedunt optimeque conveniunt peregrinatori describenti quae et quomodo viderit, si ita explicantur verba: primo loco positi sunt Aeneti tripodes nullo ornatu; nimium enim videtur statuere Aenctum victorem et statuam (a quo confecta sit, cum non addatur a Pausania, non videtur valde clari artificis fuisse) et tripodibus a claris artificibus exornatis honoratum esse. Iam paululum progrediens ad alios tripodes pervenit antiquiores illis, de clara victoria positos, quibus optime convenit maior ornatus. Tertio deinde loco maximi sequuntur de Aegospotamensi victoria positi. Quam simplicissimam explicandi rationem certe nemo non agnovisset, nisi difficultates moveret belli Messeniaci primi mentio libro quarto iniecta, ad quod reici non possunt Callo et Gitiades. Nam ex artis iudicio ad Canachi, Critii, Hegesiae aetatem deducimur intra Ol. 70—80. Quid igitur, si Pausaniae errorem in eo positum putemus, quod ad primum Messeniacum bellum referat, quae ad tertium pertineant? Summus is videtur error, nec tamen alienus a Pausania, quem certum est confudisse quae ad Ol. 29, belli secundi finem, et 71, qua Zancle Messana est appellata, pertinent, quem in iudicio de antiqua (i. e. de ea quae erat ante Phidiam) arte faciendo quam maxime videmus fluctuantem. Calloni autem si tribuimus opus paulo post Ol. 81, 2 factum, nihil impedit, quominus iam circa Ol. 70 cum artem exercuisse statuamus. Nec obstat, sed optime quadrat, quod Aeginam patriam Ol. 80 ab Atheniensibus subactam esse scimus. Relicta enim patria, ut servitutem fugeret, cum ad alias civitates confederatas, tum ad Lacedaemonios maxime Aeginctis propitios se conferre poterat. Plinii autem testimonium XXXIII, 8, 49, quam-

quam non multum ei tribuendam, qui cum Agelada illum coniungit, hac ratione aliquo modo confirmatur. — Quae cum ita sint, una restat difficultas, sed ea talis, quae removeri possit. Pausanias enim II, 32, 4 Callonis praeceptores dicit Tectaeum et Angelionem, ipsos Dipoeni et Scyllidis discipulos, quos circa Ol. 50 inclarnisse Plinius XXXVI, 4, 9 dicit. Iam si cum Muellero statuerem, non primo gradu Callonem accepisse a Tectaeo et Angelione artem (Aeg. 102: *quot gradibus nescio*) audacior videri possem. Sed salvo Plinio statuere licet, *inclarnisse* Dipoenum et Scyllidem, i. e. primum gloriam adeptos esse *marmore sculpendo priusquam Cyrus in Persis regnare inciperet*, i. e. ante Ol. 55, 2, artem vero exercuisse etiam post Ol. 60, ut Tectaeus et Angelio tunc eorum discipuli circa Ol. 70 discipulum habere possent Callonem. Possumus tamen praeterea nonnullas Olympiades detrahare Plinio. Verisimile enim est, ipsius computationem inde fluxisse, quod in Cyri de Croeso victo manubiis statuæ erant Dipoeni et Scyllidis, ut demonstravit ex Armeniis fontibus Muellerus Zimmerm. ephem. 1835, n. 110, unde id tantum certum est, artem eos exercuisse ante Ol. 58, 2. Ceterum quamquam haec Plinii computatio non valde videtur a vero abhorreere, tamen eius rationes quam sint omnino vagæ et interdum aperte falsæ, demonstrant quæ statim sequuntur de Bupalii et Athenidis proavortum tempore, qui cum circa Ol. 60 florerent, horum proavum Malam ad Olympiadum initium refert Plinius. Nimirum ita computaverat, tribuendam esse homini sexaginta fere annorum vitam, indeque quatuor hominum vitas efficere sexaginta Olympiades: non respiciens quid intersit inter vitam hominis et ætatem, quæ intercedat inter patrem et filium. Nos, si recte se habet stemma, Olympiadi circiter 40 Malam tribuere possumus Rhoeco fere æqualem.

Aeginetae Eleus videtur fere æqualis fuisse Callo (Paus. V, 25, 1); elegiam enim statuis eius *Χρύση βοτρυον* inscriptam fecerat Hippias Eleus (circa Ol. 86), quas statuas non ante

OL. 71 factas esse inde apparet, quod erant τῶν ἐπὶ τοῖς πορ-
θμοῖς Μεσσηνίων, quae urbs Messana appellata est OL. 71, 3
(cf. Sillig. p. 89, ubi alia.) Sed tamen eundem fuisse Aeginetam
et Eleum contendere non audeo, quamquam post patriam de-
victam Elide quoque aliquod tempus commorare potuit Aegi-
neta, ut inde Elei clarum sibi artificem arrogarent Eleoque
tribuerent, quae fecerat Aegineta Olympiae.

Sed redeamus ad Sicyonios artifices agamusque

De Aristocle Sicyonio, Canachi fratre, eiusque discipulis.

De quibus quae sint statuenda quamquam iam significa-
runt Muellerus annal. Vindob. XXXVIII, p. 133 et Schultzius
Iahn, annal. 1829 p. 72, reintegrare tamen quaestionem iu-
vat Thierschii maxime, quem sequitur Silligius, refellendi cau-
sa, quem nusquam in toto libro tam vidi inconstantem, tamque
sibi ipsi adversantem, quam in horum tempore constituendo,
ut male hoc exemplo refellat Muellerum, qui Aeg. 105 id ge-
nus computationis, quod solis genealogiis insisteret, acutio-
rem historiae artis crism aliquando stirpitus exturbaturam
contenderat. Primum autem proponamus veterum testimonia,
ad quae omnis disputatio recurrit, in quibus primo loco po-
nenda sunt Pausaniae verba VI, 3, 4: Παντίας . . . ἀπὸ
Ἀριστοκλέους τοῦ Σικωνίου καταριθμούμενον τοὺς διδα-
χθέντας ἑβδομος ἀπὸ τοῦτου μαθητῆς, quae discipulorum se-
ries maximam partem ex ipso Pausania restitui potest; nam
VI, 9, 1 illa: διδάσκαλοι δὲ ἐγγόμισαν Πιολίχῳ μὲν Συννόῳ
ὁ πατὴρ, ἐκείνῳ δὲ Ἀριστοκλῆς Σικωνίος ἀδελφός. τε Κα-
νάχῳ καὶ οὐ πολὺ τὰ ἐς δόξαν ἐλασσοίμενος, et paulo infra
eadem §.: Παντίας Χίος παρὰ τῷ πατρὶ διδαγμένος Σω-
στράτῳ, unde cum efficiatur haec series:

Aristocles — Synnoon. — Ptolichus — ? — ? —

Sostratus — Pantias,

hanc ipsam probat Thierschius p. 143, ibique cum disertis ver-

bis huius Aristoclis septimum discipulum dicat Pantiam, p. 281 nescio qua negligentia et inconstantia et ne verbo quidem indicans, quae priore loco affirmaverat, prorsus aliam rationem iniiit. Cum enim antea inter Ptolichem et Sostratum lacunam statuisset, postea Sostrato cum Ptolecho coniuncto, duo nomina deesse censet in seriei initio, quam Cleoeta patre, Aristocle avo Aristoclis Sicyonii e coniectura supplet, assensum ferens Silligii, qui avum illum ipsum Cydoniatam Aristoclem putat. Quae non ita esse et testimonia et temporum ratio testantur. Cydoniatam enim avum esse Sicyonii cum patria velat statuere, idque eo magis, quo frequentius apud omnes fere Graeciae populos Aristoclis est nomen, tum obstat quod eius aetatem non novit Pausanias, cum e nepotis tempore potuisset conicere. Deinde ubi Pantiam septimum dicit Aristoclis discipulum, de claro illo Canachi fratre cogitandum esse et per se verisimile est et patriae notitia confirmat. Aristoclem vero Cleoetae patrem et Aristoclem eius filium cum Cydoniata et Sicyonio coniungendos esse nihil est quod confirmet. Neque enim ubi de Sicyonio, neque ubi de Cydoniata loquitur Pausanias, horum ullam mentionem iniicit, neque horum nec Cleoetae quae sit patria affert, nec denique in Sicyonii eiusque fratris Canachi mentione de patre verbum addit. Probanda potius videtur Boeckhii corp. inscr. p. 39 et 237 et Muelleri de Phid. §. 13 coniectura, qui putant ad Atticam pertinere Cleoetam cum patre et filio. Et cum inscriptio Attica apud Boeckhium n. 23 pertinere videatur ad Ol. circ. 80, in eoque consentiat alia inscriptio Attica: *ΕΡΤΩΝ ΑΡΙΣΤΟΚΛΕΟΣ* (instit. archaeol. ephem. 1839, VI; diar. art. 1839 n. 46 et 92), operis autem, cui inscripta est, habitus paulo subtilior sit Aegineticis statuis, paulo rigidior Phidiae, hinc maxime confirmatur Boeckhii coniectura: hunc fuisse Cleoetae patrem, avum eius Aristoclis, qui in Minerva Phidiae reficienda curam posuit Ol. 95. Nam Cleoetae statua (Paus. I; 24, 3), cui galea argenteis unguibus ornata erat imposita, non repugnat, ut contendit Thierschius p. 281, cum Phidiae

temporibus in Parthenonis fastigio statuis adderentur arma aenea. Pausaniae autem verba: *δοτις δὲ τὰ σὺν τέχνῃ πεποιημένα ἐπιθροσθε τίθεται τῶν ἐς ἀρχαιότητα ἡκόντων, καὶ τὰδε δοτὶν οἱ θεάσασθαι*, si simpliciter explicamus, de antiquo opere cogitari vetant. Quae simplex explicatio non evertitur eo quod de Σπονδαίων genio assert Thierschius. Pausantas enim si τὰ σὺν τέχνῃ πεποιημένα antiquis opponit, antiqua putanda sunt ea quae primum apud Athenienses sacra habebantur: *πρῶτοι ἐπωνόμασαν, πρῶτοι ἀνέθεσαν*, quare Atheniensibus erant antiquiora quam aliis populis.

Quae cum ita sint, ad temporum computationes accedendum est. Atque Aristoclem circa Ol. 70 artem excruisse e fratris aetate concluditur. E discipulis deinde Ptolichi aetatem inde definire licet, quod fecit Theogneti statuam, cuius e sorore filius Pythia vicit paulo ante Aeginam ab Athenicis devictam (Ol. 80, 4), unde Theogneti victoria indequo Ptolichus nonnullis Olympiadibus ante ponendus erit; una enim, quam Thierschius p. 281 statuit (aliter p. 143), non videtur sufficere, cum Theognetus inter pueros, Aristomenes inter viros vinceret, nisi non statim post victoriam statuam esse factam sumere vis. Non obstaré autem, quod Synnoon Ptolichi pater ab Aristocle erat edoctus, Antiphanis exemplum demonstrat, qui paulo post Ol. 91, 3 (cf. infra) artem exercuit, cum Periclytus praeceptor esset edoctus a Polycleto post Ol. 89, 2 superstita.

Pantiam porro circiter Olympiadi 100 tribuendum esse *) inde concludere licet, quod Aristei statuam fecit, cuius pa-

*) Aequalis ei erat Philotimus Aegineta. Nam eodem tempore in uno opere utrumque occupatam fuisse, operis natura docet (Paus. VI, 14, 5). Insidebat enim in equo, quo vicerat Xenombrotus, Xenodici puer lucta victor, ut filius fuisse Xenombroti videatur. Idque inde confirmatur, quod Xenodici patriam omittit Pausanias contra constantem consuetudinem. Dubitant Muellerus Aeg. 107, Siebelsius ad Paus. I. I., Silligius.

trem Chimonem Naucydes statuis nobilitavit, unde Sostratus Pantiae pater Naucydi aequalis videtur, intra Ol. 90—100, quae computatio confirmatur Hypatodori et Aristogitonis vitarum comparatione. Hypatodorum enim cum Polycle, Leochare coniungit Plinius sub Ol. 102 (XXXIII, 4, 50). Sed iam multo ante artem eum exercuisse donarium docet Argivorum de victoria apud Oenoam Argivam reportata factum ab Hypatodoro et Aristogitone (Paus. X, 10, 2). Quam victoriam ne ad Peloponnesiacum bellum referam eo prohibeor, quod artifices Thebanorum tunc cum Lacedaemoniis coniunctorum fecisse hostium donarium de amicorum clade verisimile non est. Videtur potius ad Corinthium bellum referenda haec victoria, quo Thebani stabant a partibus Argivorum et Atheniensium contra Lacedaemonios, et ni fallor ad Ol. 96, 4. Xenophon enim quoniam Lacedaemoniorum partes agens de cladibus eorum aut tacet aut in victorias eas convertit, Diodoro utamur auctore, qui XIII, 91 haec habet: *μετὰ δὲ τινὰς ἡμέρας* (post pugnam ad Lechaem; e qua superiores Athenienses prodierant; aliter Xenophon) *τῶν Λακεδαιμονίων μέρος τῆς στρατιᾶς διῆται διὰ τῆς Κορινθίας χώρας, οἷς Ἰφικράτης καὶ υἱὸς τῶν συμμάχων ἐπιπεσόντες τοὺς πλείστον ἀνέκλον. Ἰφικράτης δὲ μετὰ τῶν πελταστῶν ἐπὶ Φλιασίαν στρατεύσας καὶ μάχην τοῖς ἐκ τῆς πόλεως* (Sicyone Lacedaemoniorum socia) *συνάψας τοῦτων μὲν πλείονες τριακοσίων ἀπέκτεινα.* Quae omnia contra Lacedaemonios eorumque socios geruntur prope Oenoam Argivam in radice montis Artemisii. Phlasiā autem secundum Strabonem VIII, 382 regio est, ut pugna in Phlasiā dici potuerit ad Oenoam esse commissā. — Ante hoc tempus factum videtur Minervae Alipherae signum in Arcadia ab Hypatodoro (Polyb. IV, 78 Hecatodorum dicit, sed cf. Paus. VIII, 26, 4) et Sostrato, quem Chium Pantiae patrem fuisse certe nihil est quod repugnet. Quae cum ita sint, retinendum est, quod initio proposuimus stemma, ut, quorum artificum notitia iam Pausaniae temporibus videtur defuisse, inter Ol. 80—90 ponendi sint.

De antiqua arte quaestiones difficillimae cum sint absolutae, restant, antequam ad Phidiam perfectae artis principem progredimur, nonnulla, quae uno capite congesta supplemento sint iis, quae antea sunt disputata.

Epiphyllides.

Glaucum Chium, qui primus ferri inter se glutinum excogitavit et iunxit (Euseb.), ob Alyattae donarium Delphos dedicatum huic potius aequalem cum Muellero arch. §. 61, quam cum Silligio secundum Eusebium iam Ol. 22 floruisse puto.

Learchum Rheginum alii discipulum putarunt Dipoeni et Scyllidis, alii Daedali αὐτοῦ, cuius discipuli erant Dipoenus et Scyllis: Paus. III, 17, 6; cf. Welcker. annal. veteris artis p. 276, qui tamen cur Dipoenum et Scyllidem Daedalidas diversos putet a Croesi aequalibus, causam non video. A quorum societate avulserunt Learchum Thierschius p. 47 et Silligius (quamquam sibi non constans, cf. Dipoenus) et licet paulo recedens ab illis Muellerus §. 70 ob opus quod fecit Spartaε σφνρήλατον. Sed cur non potuit etiam post inventam aeris fundendi artem tale opus factum esse?

De Bathycle probò Welckeri disputationem in annal. vel. art. p. 283.

Libonem Eleum, templi Iovis Olympici architectum, ad Ol. 84 referre vult Silligius. Sed cum e praeda Pisaeorum, qui Ol. 50 victi sunt, esset aedificatum, multo priore tempore inchoatum, Iovis signum, fastigiorum statuas postea demum addita esse puto, ut in Delphico templo, quod circa Ol. 60 inchoatum post Ol. 80 statu is ornatum esse constat (cf. Welcker. Mus. Rhen. 1841. I. p. 17). Ol. enim 80, 4 templum sine ornamentis exstructum fuisse, e clypeo aureo concludo, qui ob pugnam Tanagraeam dicatus in summo erat templi fastigio. Paus. V, 10, 2.

Arcesilaum statuarium ante Ol. 78, 2 vixisse e Si-

monidis carmine statuac eius inscripto certum est. Cui eidem tempori cum tribuendus videatur Arcesilaus pictor Parius cum Polygnoto a Plinio coniunctus, in eo offendit Silligius, quod cum Apellis praeceptorem dictum esse ab Athenaeo X, p. 420 D putat. Sed festivus is error. Arcesilaus enim philosophus bibendo clarus (cf. Diog. Laërt. III, 45) in bibendo Apellis praeceptor, non in pingendo pictor ibi commemoratur; quare Aridicus quoque ex artificum numero eximendus est. Tempus autem cum idem videatur statuarii et pictoris, idem uterque videtur fuisse, cum illo tempore permultos utraque arte claros fuisse memoriae traditum sit.

Dionysium Plinii XXXVI, 5, 35 ab Argivo diversum esse statuit Silligius (apud quem addendum, decem annis post Anaxilae mortem Tegeam secessisse Micythum), quia: *cum Dionysius Argivus floreret, ars marmoris sculpendi nondum adeo perfecta fuit, ut Octavianus statuam illo tempore factam in templo a se dedicato poneret.* Cui opponere placet Plinii verba XXXVI, 5, 13: *Romae signa eorum* (Bupalii et Athenidis, qui Ol. 60, multo ante Dionysium Argivum vixerunt) *sunt in Palatina aede Apollinis in fastigio et omnibus fere, quae Divus Augustus fecit.* Aliis igitur argumentis sententiam suam firmet Silligius.

Antiphili, Pothaei, Megaelis opus fuit Olympiae Carthaginiensium thesaurus. Praeter quem nullum memoratur eorum donarium in tota Graecia. Praeterea cum non videam quid eos ut Olympiae thesaurum exstruerent commovere posset, in eo ipso vero nihil esset nisi Gelonis donarium de victis Carthaginiensibus, Carthaginiensium thesaurum dictum puto, quod ex eorum praeda erat exstructus a Gelone; unde architecti aequales ei habendi sunt.

De Phidia.

Quae ab aliis iam recte constituta sunt exponere quoniam alienum est ab harum commentationum fine, significare satis

habeo: Phidiam Minervae signo ex auro et ebore confecto Ol. 85, 3, Athenis Elidem se contulisse indeque Iove facto Athenas reversum in vinculis obisse publicis Ol. 87, 1. Quod cum maxime post Muelleri sagacitatem inter omnes nunc quantum scio constet, nondum est confecta lis de anno, quo natus sit Phidias quoque artem exercere inceperit, statuente Muellero circa Ol. 73 natum sub Ol. 80 primum artem exercuisse; Thierschio: p. 113 sqq. iam Marathonii proclii tempore clarum fuisse. Mihi quidem, ut proponam quod iam demonstraturus sum, medio inter utrumque loco, quod verum sit, positum videtur. Et quo contra Muellerum monenda sunt, breviter repetere tantum opus est, quoniam copiosius ea exposuit Thierschius. Primum enim Ageladam Ol. 79 Athenas venisse et tunc institutione eius usum esse Phidiam, mera est coniectura, cui aliam posse opponi, supra sb. Ageladas docui (aliam vide infra). Idemque dicendum est de Polygnoto, quamquam nihil confirmat coniecturam Muelleri §. 4 censentis in pingendo praeceptore usum esse Phidiam Polygnoto. Ceterum quod ad Phidiam pictorem attinet, Plinii verba haec sunt XXXV, 8, 54: *cum et Phidiam ipsum initio pictorem fuisse tradatur, Olympiumque Athenis ab eo pictum*; ubi cum in codice Bambergensi omnium optimo pro Olympium sit clypeum, assentiente Monacensi et editione principe, non video cur reiecerint hanc scripturam et Silligius et L. do Ian. Aptissimam enim explicandi rationem praebent verba quae statim sequuntur: *Panaenum, qui clypeum intus pinxit Elide Minervae*. Nam quod Minervae nomen apud Phidiam non est additum, facile possumus Plinio condonare. Contra si de clypeo intelligimus, optime explicari potest, quod Plinius dicit: tradi, famam esse Phidiam pinxisse. Iam enim non exstabat pictura, quam memoravit Plinius, sed fortasse tempestate corrupta non ita multo post locum concessit caelato operi, quod ad lineas Parrhasii confecit Mys, Paus. I, 28, 2., unde eae quoque evanescunt difficultates, quae de huius erant tempore. Haec de pictore.

Deinde recte observavit Thierschius, obstare posteriori Phidiae tempori, quod in clypeo Minervae chryselephantinae, si vocabulo uti licet, senem se calvum finxerit. Nam de quinquagenario id intelligere mirum videtur, quamquam de octogenario nihil nos cogitare cogit. Deinde in eo quoque assentiendum est Thierschio, quod de Pantarcis amore disputavit. De furore enim amoris posteriores et christiani tantum scriptores retulerunt, quorum intererat Graecorum mores detrectare. Iuvenem autem pulchrum sive ob amorem sive aliam ob causam si in Iovis solio finxit Phidias, nihil in ea re per se est turpe nec alienum a senili aetate. Denique quod perfectissimum opus paucis ante mortem annis senili aetate confectum esse a Phidia non posse censet Muellerus, nullam vim habet apud Graecos ob alia exempla permulta.

Quae cum omnia recte sint disputata a Thierschio contra Muellerum, in aliis tamen ipse ab eo poterat edoceri. Recte enim impugnavit Muellerus, quae de donariis e praeda pugnae Marathoniae a Phidia factis traduntur, male quidem hoc allato argumento, non factam esse praedam hac pugna, contra Plutarchi testimonium Arist. 5 referentis Aristidem cum tribu relictum esse prope Marathonem ad custodiendos captivos et spo-
λια χύδην μὲν ἀργυρίον καὶ χρημάτων ἄλλων ἀμυθῆτων ἐν ταῖς σκηναῖς καὶ τοῖς ἡλωκόσι σκάρτεσιν ὑπαρχόντων. Herodoti enim silentium minus curandum videtur, cum non solum de praeda, sed de omnibus quae statim post pugnam Athenis gesta sint, de sacrificiis, aliis taceat. Tamen merito suspicionem movet, quod ad Marathoniam pugnam sex eaque maxima donaria referuntur. De quibus singulis quamquam multa disputare licet, iuvat statim proponere unam rationem, quae ad omnia eodem modo pertinet. Nempe depravavit historiae fidem loquendi usus, ut si quo ad Marathoniam pugnam referuntur, semper quaerendum sit, utrum ad ipsam pugnam an ad totum omnino Persicum bellum referenda sint. Quod paulo accuratius est demonstrandum. Et hunc quidem usum non sero invaluisse iam Aeschylus docet notante ipso Pausania I, 14, 4

in epigrammate sepulchrali (Anthol. Pal. II. p. 748) non Salaminiam sed Marathoniam pugnam memorans. Iam non ita multo post apud Aristophanem e populi loquendi usu haurientem fere nunquam Salaminiae pugnae mentio fit, constanter et sacpissime Marathoniam pugnam, Marathonios milites, Marathonium tempus de bello Persico omnino dicta invenimus. E Pausania vero ipso, ut luculentissimo demonstrum exemplo tunc quoque illum usum invaluisse, assero quod dicit I, 17, 6, Thesei templum aedificatum esse ὑστερον ἢ Μῆδοι Μαραθῶνα ἔσχον, quamquam ipse accuratius definit post Persica bella (Ol. 77, 2) id factum esse: Κίμωνος τοῦ Μιλτιάδου Σχερίους ποιήσαντος ἀναστήσαντος. Quibus accedit I, 14, 4: φρονῆσαι δὲ Ἀθηναίους ἐπὶ τῇ νίκῃ ταύτῃ μάλιστα εὐχάζω. Pausanias autem cum ex populi, exegetarum, si vocabulo uti licet, ore acciperet, quae nobis tradidit, iam per se verisimile est hunc vulgarem usum depravasse Pausaniae fidem idque confirmatur singulorum exemplorum natura. (De quibus cfr. Mueller. §. 9 sqq.). Nam si Pausanias refert, Minervae Areae templum esso aedificatum e praedae Marathoniae parte, quam Athenienses Plataeensibus tribuissent, eius auctoritas exaequatur Plutarchi testimonio, qui Arist. 20 octoginta talenta ἀριστέων Plataeensibus data esse refert de Plataeensi pugna, e quibus templum, picturae, decae signum sint comparata. Deinde aureos clypeos Delphicos male referri ad Marathoniam pugnam epigramma docet eis inscriptum apud Aeschin. in Ctes. p. 70 (507 R.): Ἀθηναῖοι ἀπὸ Μήδων καὶ Θηβαίων ὅτε τὰναντία τοῖς Ἕλλησιν ἐμάχοντο, ubi Thebani de Marathonia pugna cogitari vetant. — Ad Minervam porro aeneam Atheniensem quod attinet, neque in ea sibi constabat fama. Demosthenes enim de falsa legat. p. 428 quamquam oratorio modo ἀριστέων dicit, praedae pars quae erat dicenda, dicasse eam refert urbem ἀριστέων τοῦ πρὸς βαρβάρους πόλεμον (cf. adv. Timocr. p. 74, adv. Androt. p. 597). Scholiasta vero ad Aristidem p. 104 Frommel. dicatam dicit μετὰ τὸν Περσικὸν πόλεμον. — In commemoratione deinde thesauri Atheniensium Delphici

et templi Eucleae quod erat Athenis plane in universum loquitur: X, 11, 4 ἀπὸ τῶν ἐς Μαραθῶνα ἀποβάντων, 1, 14, 4 ἀπὸ Μήδων οἱ τῆς χώρας Μαραθῶνι ἔαχον, in quod dicendi genus optime quadrat, quod supra attuli. Unum tantum donarium restat Delphis positum, quod Marathomiae victoriae sacratum fuisse Miltiadis statua docet. De quo vide infra. Accedit ad ea quae de Pausaniae auctoritate dixi, quod nec Minervae Areae neque Eucleae templum aedificatum, nec Minervae statua aenea posita esse potest ante pugnam Plataensem ob eversas et spoliatas a Xerxe Plataeas et Athenas.

Quae cum ita sint, nostro iure videmur impugnare posse Thierschii sententiam, qui statim post Marathoniam pugnam exercuisse artem contendit Phidiam. Nam licet largiamur non proximo post pugnam anno in Minerva aenea operam cum posuisse, tamen ad hoc tempus deducat Pellenense signum ante Atheniense factum, quo nescio an supervacanea fiat Muelleri coniectura, Athenis Ageladae institutione usum esse Phidiam. Primum enim opus, quantum quidem scimus, cum extra patriam in Peloponneso esset positum, institutus quoque esse potuit extra patriam in Peloponneso Phidias. Reputanti autem mihi, quod Minervae Areae templum e Plataeensis pugnae praeda, aeneam Atheniensem statuam belli Persici universi memoriae dicatam esse verisimile est, non improbabili me puto coniectura concludere posse: Phidiam sub Ol. 70 natum circa Salaminiae pugnae tempus artem exercere incepisse. Plataeense enim signum non primis post pugnam annis tribuendum videtur, cum antequam poneretur templum esset aedificandum. Nec Athenienses aeneae Minervae curam habuisse probabile est, antequam urbs esset restituta. Delphicas autem statuas a Phidia factas non statim post Marathoniam victoriam positas esse ex illo ipso Miltiadis signo concludo. Non enim verisimile est Athenienses eum statua honorasse, quem non ita multo post Marathoniam pugnam in vinculis tenebant publicis. Quare ei potius tempori tribuendae hac statuae videntur, quo Cimone Miltiadis filio

summa apud Athenienses auctoritate pollente, in ipsa quoque Athenarum urbe pictus est in pocile porlicu a Panacno Miltiades. Conciliari autem optime cum hoc tempore potest, quod in scuto Minervae chryselephantinae *πρωβύτην φαλακρόν* se finxit, sexaginta tunc et nonnullos annos natus. Polygnoli vero et Onatae tempus, quibuscum una occupatus erat in Plataeensi templo exornando, quam maxime convenire, ex eo apparet quod de Onata supra attuli, de Polygnoto ob pociler et Theseum pictum constat. — Denique cum in quaestionibus tam difficilibus viri in litteris insignis assensus augeat fidem, scias hanc quam firmare conatus sum sententiam in scholis proposuisse Welckerum, praecceptorem dilectissimum, quamquam copiosius cum exposuisse rationes non memini.

De Phidiae discipulorum temporibus fere nihil dicendum est. Nam de Agora crito, Colota, in Iove faciendo Phidiae adiutore, Paconio Mendaeo, qui, si Messeniorum donarium (Paus. V, 26, 1) ro vera de Lacedaemoniis in Sphacteria Insula captis positum erat, post Ol. 88, 4 superstes erat, nihil omnino innotuit, unde tempus accuratius possit definiri. Alcaemenem post Ol. 94, 2 superstitem fuisse e Thrasybuli signis ob liberatam a tyrannide patriam Thebis positis (Paus. VIII, 11, 4) recte concluditur. Theocosmum Megarensem, qui adiutore Phidia Iovis signum inceperat, Ol. 93, 4 superstitem fuisse e signis de Aegospotamensi victoria positis certum est.

Quare transeundum nunc ad Phidiae aequalem et in arte aemulum.

De Polycleto.

Quod de Agelada contenderat Thierschius: fuisse duos eiusdem nominis artifices, alterum Argivum alterum Sicyonium, idem de Polycleto statuit prorsus eodem modo Sicyonium et Argivum secernens. Qua in re quamquam fere neminem video assentientem (praeter Ross. archaeol.), tamen

neminem dum omni ex parte eum refellisse inveni. Silligius enim aliqua ex parte tantum eum impugnare potuit, cum in secunda demum epocharum editione, quae prodit post catalogum, copiosius de Polycleto locutus sit Thierschius. Quare deo eum impugnare supervacaneum non videtur. Et Thierschius quidem in causa sua defendenda veterum scriptorum auctoritatem sibi vindicare vult. Quod quo iure possit, iam videndum est. Sicyonium dicit a Plinio, Argivum a Pausania, aliis appellari. Iam si hanc ob causam duos fuisse Polycletos sumamus, quantas in difficultates incurramus Silligius vidit. Primum enim dubitationem movet, quod Argivi per totam antiquitatem celebratissimi ita nullam mentionem Plinius faciat; deinde magis etiam nos offendat oportet, quod Pausanias duorum illorum rationem non habet, cum alia ratione duos, Argivum utrumque, disertis verbis seiungat. Utriusque igitur Polycleti cum neuter scriptor mentionem faciat, accedit quod argumentandi artificio opus est Thierschio. Nam cum ob veterum testimonia negare non possit, ab Argivo factam esse lunonem, Argivam, de clarissimo autem illo Plinium agere concedat, omnia opera quae Sicyonio tribuit Plinius, ei sunt detrahenda, ut nullum sit reliquum, quod certo ei tribuamus.

Hae igitur summae dubitationes cum obstant Thierschio, non magis temporum ratio ei succurrit. Quod enim Agcladae aetatem obstare dicit, id nihili esse supra demonstravimus. Artificiosius deinde retrahere conatur Polycleti aetatem eo quod, ubi de Telephane sermo est, qui *se regum Xerxis atque Darii officinis deditit*, Plinius XXXVIII, 8, 68 in comparatione ante Myronem et Pythagoram ponat Polycletum. Idem enim ibi facit, ubi (init. cap.) enumerans artifices clarissimos Olympiadi 90 Polycletum assignat. Quare si ex illis verbis Polycletum Dario fuisse aequalem contendit, idem de Myrone et Pythagora faciat oportet, quamquam eodem iure quo illud Thierschius, cum Darii nomen post Xerxem positum sit, Darium Nothum significatum esse, contendere quis possit.

Quae cum ita sint, accedendum est ad ea argumenta,

quae e Plinii de artis Polycleti iudicio hausta sunt. In quibus vix satis caute agere possumus, cum corruptissima esse Plinii verba cum omnia tum haec quoque notum sit (cf. Sil- lig. v. Polycletus). Certe obscura est sententia horum Plinii verborum: „*Hic consummasse hanc scientiam iudicatur et toreuticen sic erudisse ut Phidias aperuisse.*“ Quenam enim sit illa scientia, ex antecedentibus concludere non licet; nisi, quia hoc libro de iis agitur, qui aere fundendo clari fuerunt, de aeris fundendi arte intelligere velis. Sed tamen mirum videtur Plinium lunonem Argivam, celeberrimum Polycleti opus, ne verbo quidem significasse, nec ullam chryselephantinae artis mentionem fecisse. Quod suspicionem movet, aut intercidisse aut Plinii negligentia omissam esse huius artis mentionem, ut haec sit illa quam consummaverit Polycletus scientia. Quod confirmat Strabonis de ea iudicium (VIII, 372). Quod enim de toreutica arte dicit Plinius, ad chryselephantinam non pertinet. Quod hoc loco demonstrare (quamquam cum Plinius ipse de duabus artibus discrete loquatur, demonstrare ne opus quidem est) eo libentius omitto, quoniam hunc viris doctis errorem se adepturum professus est Welckerus. (Ceterum cf. Mus. Rhén. 1834. II, p. 486.) In toreutica aulem arte, i. e. in auri et argenti caelatura non parvam fuisse Polycleti gloriam docent Martialis verba iam a Boettigero (Andeut. p. 128) laudata, VIII, 50:

Quis labor in phiala? docti Myos ane Myronis?

Mentoris haec manus est, an Polyclete, tua?

(Quae ibidem affert Iuvenalis III, 217; VIII, 102, non quadrant.)

Non possum quin hac occasione oblata tertium Silligii Polycletum ex artificum numero expellam. Tertium enim eum dicit, qui vel Persarum regi alicui vel Perseo regi Macedoniae lucernam fecit [τῷ Πέρσῃ], ob quam in magno honore habitus est. Quae sola τοῦ Πέρσου commemoratio cum me non commoveret, ut tertium inferrem in historiam Polycletum, accuratius inspexi verba, quae de lucerna illa sunt apud Athenaeum V, 206 E haec: Μοσχίων scribit: Διοκλείδης μὲν δ

Ἀβδηρίτης θαυμαζέτω (ita correxit Ritschellius de Marsya in indice schol. Vratisl. 1836. p. 12: *admirator*. Vulgo θαυμάζεται) ἐπὶ τῇ πρὸς τὴν Ῥοδίων πόλιν ὑπὸ Δημητρίου προς-αχθείῃ τοῖς τείχεσιν ἐλεπόλει, Τίμαιος δ' ἐπὶ τῇ πρυμνῇ τῇ κατασκευασθείῃ Διονυσίῳ τῷ Σικελίας τυράντῳ, καὶ Ἰερώνυμος ἐπὶ τῇ κατασκευῇ τῆς ἁρμαμάξης, ἣ συνίβαινε κατακομισθῆναι τὸ Ἀλέξανδρον σῶμα, Πολύκλειτος δ' ἐπὶ τῷ λυχνίῳ τῷ κατασκευασθέντι τῷ Πέρσῃ. . . . Quae verba primum non intelligebam. Quid enim inter rerum scriptores Polycleti nomen? De qua difficultate quid censendum sit, docent Athenaei verba XII, 539: Πολύκλειτος δὲ ὁ Λαρισσαῖος ἐν τῇ ὁγδόῃ τῶν ιστοριῶν καὶ ἐπὶ χροσῆς κλίνης κοιμᾶσθαι φησι τὸν Ἀλέξανδρον. (Saepius memoratur a Strabone.) Polycle- tus igitur Larissaeus, qui de rebus Alexandri Magni videtur scripsisse, memoravit Persae lucernam, non clarus fuit ob lu- cernam Polyclethus caelator.

Sed haec in transcurso tantum, cum ad Polycleti tem- pus constituendum non pertineant. Verba autem Plinii quae offendunt Thierschium haec sunt (XXXIII, 8, 56):

I. *Proprium eius est, ut uno crure insisterent signa ex- cogitasse.* Quod *excogitasse* non convenire Polycleti Argivi aetati dicit Thierschius, sed temporibus multo antiquioribus, artificibus Canacho, Ageladae aequalibus. Exemplo esse vult Apollinem Musagetam Monacensem, qui Phidia antiquior uno crure insistat. Quem multo posterioris, fere Romanae ae- tatis esse certum videtur, licet grave et severum artis genus sectatus sit in eo artifex. Sed utamur oculis nostris, exami- nemus illa artis opera, quae ad Polycleteorum similitudinem confecta videntur, doryphorum, diadumenum: iam dubitare non poterimus quomodo sit intelligendum illud „uno crure insistere.“

II. *Quadrata tamen ea esse tradit Varro.* In quibus verbis explicandis mirum in modum se torserunt interpretes, quamquam nihil videtur facilius ad explicandum. Quid enim sibi velint, e Plinii de Lysippi arte iudicio apparet §. 65: *Non habet latinum nomen symmetria, quam diligentissime cu-*

stodicit, nova intactaque ratione quadratas ceterum staturas permutando. Quae mutatio sic facta est: capita minora faciendo, quam antiqui, corpora graciliora siccioraque, per quae proceritas signorum maior videtur. Quadrata igitur sunt Polycleti signa, si cum Lysippo comparantur, qui vulgo dicebat ab illis factos quales essent homines, a se quales viderentur esse. (Incuriae tamen accusandus est Thierschius, quod prorsus neglexit, quae attulit Silligius: deesse quadrata vocabulum in eodicibus; quamquam non esse eiendum docuit codex Bambergensis, cui assentiuntur Gelenii libri.)

III. Et paene ad unum exemplum. Enumeratis enim operibus Thierschius suavissima varietate ea omnia confecta dicit. Id ipsum est, quod Plinius vult, quod in sola suavitate variaverit Polycletus. Idque mirum in modum confirmat Quinctiliani iudicium XII, 10: *ne nihil detrahatur, deesse pondus putant. Nam ut humanae formae addiderit supra verum, ita non explesse deorum auctoritatem videtur. Quin aetatem quoque gravem dicitur refugisse, nihil ausus ultra leves genas.* Quare cum sint complura genera, in quibus elaborandum est artifici, Polycletus in uno tantum variavit, suavitatem iuvenilis aetatis in omnibus operibus tamquam unum exemplum sectans.

III. In auxilium vocat Thierschius Plinii de Myrone verba haec (l. I. §. 58): *Primus hic multiplicasse veritatem videtur, numerosior in arte, quam Polycletus et in (om. in vet. edit.) symmetria diligentior.* In quibus verbis primum falso intellexit Thierschius, ut multi alii, *numerosior* vocabulum. Dicit enim e Graeco *εὐθυμνος* translatum esse. Ego vero dico, ex eo scriptore quem tractamus ipso, si fieri potest, ipsius dicendi genus definiendum esse. Quare primum repeto Silligii verba p. 285: *Plinius de Lysippo loquens dicit: „non habere Latinum nomen symmetriam;“ sed quid „numerus“ illa explicatione probata aliud est quam symmetria?* Deinde autem inquirō, quā significatione uti solent Plinius nu-

merosus vocabulo. Et de Antidoto XXXV, 11, 130 dicit: *ipse diligentior, quam numerosior*. Sed nonne cernitur in ἐν-
 ὄρθια, σπουδαιότερα diligentia? Aptè contra se habent ita ver-
 ba: „diligens in eis quae fecit, sed ea non permulta, varia
 erant.“ Deinde de Pausia Sicyónio (l. l. §. 125): *ad numero-
 sissimam florum veritatem perduxit artem illam* (coronarum
 pingendarum). Denique de Aristophonte §. 138: *numero-
 saque tabula, in qua sunt Priamus, Helena, Credulitas, Uli-
 xes, Deiphobus, Dolon*. Quibus exemplis allatis iam neminem
 puto cogitaturum esse de ἐνὸρθια Myronis hoc vocabulo si-
 gnificata. In reliquis quidem verbis destituimur librorum te-
 stimoniis. Ut sunt in libris, iis uti non possumus. Sed quo-
 niam tam bene omnia in unum Polycletum quadrant, iam non
 dubito ad coniecturam confugere, quam quod desperantis esso
 dicit Thierschius, non curò. Nam cum desperantis esse in
 scriptore plane emendato, qualis est nullus, videri possit, licet
 profecto conicere in scriptore, de cuius emendatione nobis prope
 desperandum sit. Quare cum recenseo viatorum doctorum con-
 iecturas, praeter reliquas mihi placet ea quam in scholis pro-
 posuit Welckerus: *numerosior in arte, quam in sym-
 metria diligentior*. Interpolator enim quidam post *quam*
 desiderans nomen artificis, qui cum Myrone compararetur, e
 Plinii de Polycleto verbis *paene ad unum exemplum* Polycleti
 nomen arcessivit, non animadvertens quam esset Pliniana
 oratio nomine omisso. Ut enim, quod supra attuli, dicit *dili-
 gentior quam numerosior*, ita hic *numerosior quam diligentior*.

Nihil igitur cum supersit, quo defendatur Thierschii opi-
 nio, iam Plinio largiamur, Sicyone oriundum fuisse Poly-
 cletum, nobis sumamus et institutum esse in arte et exercisse
 eam Argis. In quo eo minus est quod miremur, cum et af-
 finitate et amicitia et quam maxime artium scholis antiquitas
 coniunctas videamus has civitates. De duobus igitur Polycle-
 tis si loquimur, de iis tantum cogitandum est, quos discernit
 Pausanias, utroque Argivo, altero Ageladae, altero Naucydis
 discipulo, maioris fortasse nepote. Quorum opera omnia quam-

quam certo inter eos distribui non possumus, de nonnullis tamen confidentius loqui licebit. Et apud Plinium quæ enumerantur, videntur omnia maiori tribuenda. Ex eis autem quæ Pausanias describit, præter Iovem Philium Megalopolitanum (sed cf. Sillig. p. 362), Alcibiadem, Agenorem Thebanum, Venerem Amyclæam, quæ iam Silligius minori assignavit (de Proserpina Argiva cf. infra Periclytum), certis argumentis duo ei sunt vindicanda opera: 1) Antipatri Mlesii pugilis statua (Paus. VI, 2, 4), cui cum legati Dionysii, Syracusarum tyranni, persuadere conati sint, ut Syracusanum se renuntiaret, viciisse eum post. Ol. 93, 3 certum est, quo anno tyrannidem occupavit Dionysius: ut statua a Polycleto maiore confici non potuerit; 2) Iovis Milichii quod erat Argis signum. Nam cum Peloponnesiaco bello Argivi elegissent mille e civibus nobilissimis, qui perpetuo arma gererent (Thuc. V, 67; Diodor. XII, 75), a populo sunt oppressi, quod imperium peterent. Idque factum esse Ol. 90, 3 narrat Diodor. XII, 80. Quod idem ubi retulit Pausanias II, 20, 1, pergit: *ἔσι τερσεν δὲ ἄλλα τε ἐπηγάγοντο καθύρσια, ὥς ἐπὶ αἵματι ἐμφυλίου καὶ ἀγαλμα ἀνέθηκαν Μελιχίου Διός*. Quare hoc quoque opus ob tempus videtur tribuendum minori. Quod marmoreum opus si dandum est minori, unum tantum marmoreum restat (Paus. II, 24, 6): Apollinis, Dianæ, Latonæ statuæ in Lyconæ monte positæ. Quod opus certa ratione neutri potest vindicari. Sed cum minorem sciamus marmorea fecisse, de maiore nil innoverit, fortasse ob id ipsum minori est tribuendum, ut maiorem marmore omnino abstinuisse verisimile sit.

De Polycleti discipulis quæ dicenda sunt, inserere præstat ei capiti quæ agendum est:


De artificibus qui sub Peloponnesiaci belli finem floruerunt.

In donariis ob victoriam Aegospotamensem Delphis et Amyclis dedicatis una erant occupati itaque paulo post OL. 93, 4 artem exercebant:

- | | | |
|----------------------|----------------|-------------------|
| 1. Tisander, | 5. Alypus, | 9. Polycletus II, |
| 2. Athenodorus, | 6. Antiphanes, | 10. Aristander, |
| 3. Demeas Clitorius, | 7. Piso, | 11. Theocosmus. |
| 4. Canachus II, | 8. Patrocles, | |

(Paus. X, 9, 4; III, 18, 5. Theocosmus non habuit quidem partem operis, sed voluit habere, ergo vixit). Et de 1 et 10 nihil, de 2, 3, 4 id tantum innotuit discipulos fuisse eos Polycleti Argivi, Canachum etiam OL. 95 vixisse: Paus. VI, 13, 4; Plin. XXXIII, 8, 50. Qui praeterea ibi nominantur discipuli, nusquam alibi memorantur. Post Canachum (sed quando, incertum) vixit Asterio, Paus. VI, 3, 1. Canachus enim Bycelum fecit, qui primus Sicyoniorum pugil puer vicit, Paus. VI, 13, 4; Chaereae statuum, item Sicyonii pugilis pueri Asterio. — Antiphanes deinde Periclyti, Alypus et Polycletus Naucydis discipuli erant, unde iam ad quaestionem de his Polycleti I discipulis instituendam deducimur. In qua initium est faciendum a vexatissimis Pausaniae verbis II, 22, 8: τὸ μὲν Πολύκλειτος ἐποίησε, τὸ δὲ ἀδελφὸς Πολύκλειτου Ναυκύδης Μόθωνος. Ita enim post Thierschium Silligius et Schubarthius cum Walzio. Sed non videtur in hac scriptura acquiescendum. Recto enim, licet repugnante Thierschio p. 284, Muellerus annal. Vindob. XXXVIII. p. 131 animadvertit, verisimilius Periclyti fere ignoti nomen a librariis mutatum esse in Polycleti notissimum, quam Polycleti in Periclyti. Itaque ut dicam quod sentio, malo sequi Muellerum haec proponentem: τὸ μὲν Περικλῆτιος ἐποίησε, τὸ δὲ ἀδελφὸς Περικλῆτιου Ναυκύδης Μόθωνος (aliter archaeol. p. 97), ut etiam priore loco Periclyti minus noti nomen repulsum sit a Polycleto, qui

altero quoque loco paene superaverat. Quam coniecturam ut accipiam id valde me movet, quod in aliis verbis VI, 6, 1: *Πολύκλειτος δὲ Ἀργεῖος; οὐχ ὁ τῆς Ἡρας τὸ ὑγάλμα ποιήσας, μαθητὴς δὲ Ναυκίδου*, discipulum quidem Naucydis, sed non fratrem dicit Polycletum, ubi plurimum intererat Pausaniae hoc addere, si cognitum habuerat. Unde hoc stemma prodit:



His constitutis de singulis brevissime agi potest; de Naucyde enim et eius discipulis nihil addendum, nisi Plinium Olympiadi 95 tribuere Naucydem, qua Olympiade aetate iam provecior fuisse putandus est, cum ante eam discipuli artem iam exercerent.

Paulo plura dicenda sunt de Antiphane Periclyti discipulo. In cuius operibus recensetur Argivorum donarium de victis ad Thyreas Lacedaemoniis dicatum, Paus. X, 9, 6. Quod ad bellum illud iam ab Herodoto I, 82 commemoratum (Ol. 58) a viris doctis est relatam. Nimirum illius belli memoria obscuraverat alius pugnae famam iam apud Pausaniam ipsum. Ol. enim 91, 3: *Ἀργεῖοι ἐσβαλόντες ἐς τὴν Θυριᾶτιν ὁμορον οὐσαν λείαν τῶν Λακεδαιμονίων πολλὴν ἔλαβον, ἣ ἐπράθη ταλάντων οὐκ ἔλασσαν πέντε καὶ εἴκοσι*, Thuc. VI. 95. Ad hanc igitur victoriam donarium est referendum, quod ab Antiphane aut statim post pugnam aut, si nimis videtur produci eius aetas, post bellum finitum erat factum. Non minus falso aliud Antiphane opus refertur ad victoriam multis annis a donario remotam: Tegeatarum de Lacedaemoniis quod Delphis erat positum, Paus. X, 9, 3. Cuius operis tempus si fere recte constituit Muellerus anal. Vindob. XXXVIII, p. 132, casu id factum est et ob rationem prorsus falsam.

Erravit enim cum post Ol. 103, 4 hoc donarium factum esse statuit ob Triphyli statuam, quoniam hoc demum anno Triphyli Arcadiae esset assignata. Diodorus enim XV, 77 narrat, Eleos tunc Areadibus denuo eripere Triphyliam conatos esse nullo successu; cf. Xenoph. Hell. VI, 5, 2. Contra iam Ol. 94, 4 Elei a Lacedaemoniis iussi sunt Triphyliae libertatem reddere, eaque Ol. 95, 2 conditio erat pacis: Xen. Hell. III, 2, 23; Diod. XIII, 17; Paus. III, 8, 2 init. et fin. — Inde igitur cum ad Ol. 95, 2 reiciamur, rursus ad Ol. 102, 4 deducimur Tegeatarum de Lacedaemoniis victoria reportata teste Diodoro XV, 62, cll. 59. Hoc igitur tempore superstitem fuisse Antiphane statuendum est, simul autem Ol. 103 assignandi sunt Pausanias Apolloniata, Daedalus Sicyonius, Samolas Arcas, Antiphanis in donario faciendo socii. Cuius discipulus Cleo iam Ol. 98 artem exercebat, praecceptore diu superstite, cum faceret Iovis statuam et multa, quam ludorum Olympicorum arbitri Eupolo eiusque sociis inposuerunt hac ipsa Olympiade; Paus. V, 21, 2. Ol. 102 artem cum exercuisse quamquam verisimile est, tamen id si e Dinolochi statua (Paus. VI, 1, 2) concludit Silligius, demonstrari hoc nequit. Nam Dinolochum Troiti fratrem fuisse, qui vixit Ol. 102, in Pausaniae verbis non inest, nec probabile videtur, cum Troitus esset ludorum arbiter, ergo aetate proVectior, Dinolochus vinceret inter pueros. Neque eadem Olympiade utrumque vicisse e Pausaniae verbis ullo modo constat; cf. Krausii Olympia p. 266. — De Pisonē quae tradit Pausanias VI, 3, 2, optime quadrant in tempus belli Peloponnesiaci finiti. Optime enim se habet hoc stemma:

Critius 75, 4 — Ptoichus (82) — Amphio (88) —
Piso 94 — Democritus (100).

De Patroclis aetate cum Pausaniam consentit Plinius XXXIII, 8, 50 Olympiadi 95 cum tribuens, quo eodem tempore artem iam exercuit Daedalus Sicyonius eius discipulus, Eleis tropaeum erigens de Lacedaemoniis (cf. Sillig.). Quem 102, 4 superstitem fuisse, sub Antiphane vi-

dimus. Confirmatque hoc tempus, quod fecit Eupòlemi (Ol. 96: Paus. VI, 3, 3; VIII, 45, 3; Afric.) et Aristodemi (Ol. 98: Paus. VI, 3, 2; Afric.) victorum Olympicorum statuas. — Et filium fuisse Patroclis Daedalum negandum videtur; cf. Schubart. et Walz. ad Paus. VI, 3, 2 et Schultz. in Iahn. annal. 1829 p. 78. Patrocles Crotoniata et Daedali praeceptor num idem fuerint, pro certo affirmare non licet.

Pythagoras Rheginus cum fecerit statuas Astyli, qui vicit Ol. 73, 74, 75; Dromei, Ol. 74, 76, 77 (cf. Krausii Olymp.), non video cur a Silligio Olympiadi 73, a Thierschio ipsi Olympiadi 70 tributus sit. Nam cum aequalis esset Myroni, Polycleto, non erat offendendum in iudicio Diogenis Laert. VIII, 25. de rhythmo et symmetria et Plinii de venis et capillis, XXXIII, 8, 59. Neque erat quod Silligius Samium significatum esse a Plinio XXXIII, 8, 49 putaret, cum §. 59 Rheginum coniungat cum Myrone, quem eidem Ol. 90 tribuit.

De Cresila, Ol. 91, 3 superstite conferatur Rossii commentatio in diar. art. 1840, p. 12: De Pyrrho et Stypaee eiusdem 37 et 38. De Apollodoro 12, de Aristonida 16. De eis qui Erechtheum ornaverunt, 1836, 39, 40; 1840, 18. In quibus cum sit *Πραξιās ἐν Με-λίῃ οἰκῶν*, Calamidis hunc esse discipulum Rossius vult, qui statuas fecerit in fastigio Delphici templi cum Androsthene. Sed cum ante Ol. 89 perfectae eae videantur (cf. Welcker. Mus. Rhen. 1841, p. 15 sq.), Praxias autem mortuus sit in ipso opere, non videtur idem fuisse occupatus in Erechtheo, quod Ol. demum 92 perfectum est.

De artificibus, qui Ol. C—CXIII floruerunt.

De his si pauca tantum dicentur, reputandum est, nonnisi de temporibus artificum hac commentatione agi. De operibus autem cum permulta sint tradita, ea ita sunt comparata, ut inde ad aetatem constituendam fere nihil redundet fructus. Victoriarum enim donaria, e quibus saepe constituimus tempus, rarissime commemorantur; victorum Olympicorum statuae a claris artificibus, quorum memoria superest, raro videntur factae. Nitendum est igitur Plinii rationibus, quae quamquam sat sanae videntur in hac aetate, tamen non obliviscendum, quantum ab illo sit erratum in Phidiae aequalium aetate; ut ubi alia adsint argumenta temporum constituendorum, iis uti malim. Libenter igitur utor eo testimonio, quod complures eosque clarissimos artifices in uno opere collocasse operam certiores nos facit: de Mausoleo loquor, quod exornatum est a Scopa, Bryaxide, Timotheo, Leochare, Pythide (Plin. XXXVI, 5, 30), quibus a Vitruvio (VII praef.) dubitante de Timotheo additur Praxiteles, Mausolo mortuo Ol. 106, 4 (cf. Amalth. III, 286; Diodor. XVI, 36), Artemisia 107, 2 nondum perfecto opere. Aequalium igitur horum artificum tempora singulorum, ut antea, ita pertractabimus, ut eis alios subiungamus. Primum igitur de Scopa, quem, cum Tegeae templum Minervae aedificaret, quod delagrarat Ol. 96, 2 (Paus. VIII, 45, 4), inde ab hoc tempore usque ad Ol. 108 vixisse recte statuit Silligius Amaltheae l. l. Qui si ibidem confirmari id putabat Ephesii templi historia, proposita apud Plin. XXXVI, 14, 95.: *caelatae coniectura Una Scopa operi praefuit Chersiphron*, ipse iam in editione Plinii eam non probat ob Chersiphronis tempus, meliusque erit sequi Winkelmanni coniecturam (Mon. ined. II, 271): *columnae caelatae uno e scapo*. — De Bryaxide nihil addendum nisi propter Seleuci statuam (Plin. XXXIII,

8, 73) non necessario usque ad Ol. 117 (Sillig. p. 110; Ol. 119: Mueller. archaeol. p. 113) vixisse Bryaxidem, quia antequam rex esset factus Seleucus, statua poterat confici, quod de Lysippo recte statuit Silligius p. 253, siquidem recte se habcat inscriptio. — Leocharem (Ol. 102 secundum Plinium) etiam post Ol. 110, 3 vixisse cum e donario a Philippo ob Chacroneensem victoriam dicato recte constituerint viri docti, aliud testimonium attulit Rossius archaeol. §. 149, 2; 154, 4, unde sub ultimos Alexandri annos eum vixisse certum est. Fecit enim secundum Plutarchum (Alex. 40) cum Lysippo Alexandrum leonem interficientem, ad quod opus pertinere videtur, quod in Lysippeis recensetur a Silligio vigesimum tertium. Unde prorsus aequalem fuisse Leocharem Lysippo intelligitur. Leochares enim cum Ol. 102 tribuatur a Plinio, Lysippum eodem fere tempore artem exercere incepisse statuendum est propter Troili statuam Ol. 102 victoris. — Leochari Sthennidem quoque aequalem fuisse, licet a Plinio Olympiadi 114 assignatus sit, Rossius docuit diar. art. 1840; 32: in una enim basi statuæ erant positæ utriusque artificis. Iam scimus e Strabone XII, 546 Sthennidem Sinopensibus fecisse Autolycum, ἐν οὐκιστῇν ἐρόμειζον. De Leochare autem Plinius §. 79 narrat, fecisse eum *puerum Autolycon pancration victorem, propter quem Xenophon Symposium scripsit*. Cui statuam positam esse, e Pausania scimus I, 18, 3; VIII, 32, 5, qui artificis nomen omittit. Quem Autolycum cum Ol. circiter 90 vixisse consentaneum sit, ne quæ de Leocharis ætate aliunde scimus evertantur, statuere sane licet posteriore demum Autolyçi ætate statuam esse confectam. Sed in promptu alia quoque est coniectura: nomina esse confusa et una cum Sthennide operam posuisse in Sinopensi Autolyco faciendo Leocharem. — Nec de Praxitele Atheniensi post Silligium quidquam addendum. De Strongylione ei æquali (Paus. I, 40, 2) cf. p. I ann. — De Cephisodotis acquiescendum est in eis, quæ Silligius attulit (cf. Ross. diar. art. 1840, 12. — De Polycle Atheniensi, quem opponi vult Sil-

ligius priori a Plinio sub Ol. 102 commemorato, infirmior videtur coniectura. Polyclis autem filios fuisse Timoclem et Timarchidem, e vocabulis Pausaniae X, 34, 4: καὶ τοῦτο recte suspicatur Muellerus anal. Vindob. XXXVIII, p. 132. Plinius autem cum sub Ol. 156 commemoret Timoclem, Polyclis minoris filium cum puto, licet eidem Olympiadi tribuatur pater. — De Euphranore denique quaestionem ad pictorum tempora differre placet.

VA1
1543642

V I T A.

Natus ego sum, Henricus Brunn, Woerlthiae oppidulo Anhaltino - Dessaviensi, a. d. X. Calendas Februarias anni MDCCCXXII, patre Henrico, sacrorum ibi anliste, matre Amalia Albertina e gente Lindstedt, quos parentes carissimos superstites adhuc veneror. Primis litterarum elementis in patriae schola, deinde a patre imbutus, cui maxime ob accuratam in latina lingua institutionem gratum publice testor animum, tredecim annos natus traditus sum et erudiendus et educandus Francisceo Servestano, quod Henrico Rittero direttore floret. Quo in gymnasio quatuor annos et dimidium commoratus cum maturitatis testimonium rite impetrassem, philologiae operam daturus Bonnam me contuli consilio motus Caroli Sintenisii et Werneri, professorum Servestanorum, qui, qua benevolentia iam antea me amplexi sunt, eam mihi in ipso discessu testati sunt luculentissime. Huius enim almae litterarum sedis civibus adscriptus a G. A. Goldfussio, tunc Rectore Magnifico, IV. Non. Novemb. MDCCCXXXVIII, nomen cum dedissem apud I. Plueckerum, tunc philosophorum ordinis decanum, illorum virorum epistolis factum est, ut summa reciperer benevolentia a F. Th. Welckero et F. G. Ritschelio. Quodrum institutioni cum me inde ab initio plane dederem, accessit quod post sex menses sodalis adscriptus ordinarius seminario phi-

lologico arctiore etiam disciplinae vinculo cum iis coniungerer. Et quamquam post duos annos gratissima Welckeri et institutione et consuetudine frui iam non licere mihi dolebam, retinebat me tamen Ritschelii summa benignitas, cui utrique quales possim referre dignas gratias nescio. — Praeter exercitationes autem seminarii philologici, cuius honorarium sodalem nunc quoque me esse voluit Ritscheliuss, et Ritschelii et Welckeri scholas quas habuerunt omnes, interfui scholis habitis de rebus philologicis a C. L. Ulrichsio, historicis ab I. G. Loebellio, de philosophia a Ch. A. Brandisio et I. H. Fichtio. Quibus viris omnibus facere non possum quin pro beneficiis in me collatis et benevolo erga me animo quam maximas gratias agam.

SENTENTIAE CONTROVERSAE.

1. *In critica arte malo errare via et ratione, quam sine ratione verum invenire.*
2. *Ineptiunt qui artem grammaticam ad sola philosophiae praecepta construendam iudicent.*
3. *Archaeologia quae dicitur pars est philologiae recte definitae.*
4. *Non evincitur artificum historia, floruisse artem in Graecia iam Olympiadum initio.*
5. *Apud Arrian. exped. Alex. VII, 13 pro Κίμωνος scribendum est Μίκωνος.*
6. *Apud Gregor. Nazianz. in diar. art. 1830 n. 84 pro Κάλαϊς scribendum est Κάλαμις.*
7. *Apud Paus. VI, 10, 2 νῆωνοις vocabulo mutato in νῆωνῶ omnia recte se habent; v. Krausii Olymp. p. 384.*
8. *Gruppij Theogonia Hesiodia non videtur esse Hesiodia, sed antiquissima Boeotica.*
9. *Male retinet Gruppius in theogonia sua versus 918 —920.*

10. *In Sophoclis Aiace post v. 595 remanent in scena Aiæx et Tecmessa.*
11. *Ibidem in oratione v. 646—692 non mentitur Aiæx.*
12. *Ibidem v. 1309 τρεῖς vocabulum intelligendum est de Teucro, Agamemnone, Menelao.*